

ናሂሚያ ጊደ ቆፋ

ናሂሚያ ማጻፋይ ሄቹ ከዚ ሻኬታናሰ ዳንዳዬሰ።

1. ዩሁዳ ዳሬዛ አይሳናሰ ፓሪሴ ካዎይ ዩዲዳ ናሂሚያይ ካለሉን ዩሩሳላሜ ገምቤቲ ኦራጺዳይሳ ዮቴሰ፤ ሄሳፌካ ናሂሚያይ እያና ዮኦታኔ አሾ ዮኦታ ኦራሉዳሰ።

2. ጸሳ ዎጋ ማጻፋ ኢዝራይ ናባቢዳይሳ፥ ዳሬዚ ባ ናጋራ ፓጺዳይሳ ሃ ማጻፋዚ ዮቴሰ።

3. ናሂሚያይ ዩሁዳ ዳሬ አይሲሼ ኢዚ ኦሉዳ ሃራ ሃራ ኦሶታካ ሃ ማጻፋዚ ዮቴሰ። ኢዛ ማጻፋዛን ከሂ ቆንጨን ቤቲዛይ ናሂሚያይ ጸሳን አማኒዛ ሚኖ አማኖ ኢዚ ጸሳኮ ሺሺዳ ዎሳታ ገሻሰ ዮቴዛ ታሪኬ።

ሃ ማጻፋይ ኦይኪዳ ኩሜሳ ቆፋ

ካዎ አርጾኪሲሲ ናሂሚያ ዩሩሳላሜ ዩዶ 1:1—2:10

ዩሩሳላሜ ገምቤይ ናምኣንሶ ሲሚ ገምቤቴላ 2:11—4:22

ማንቆታሰ ናሂሚያይ ቆፒዳ ቆፋ 5:1-19

ሞርኬይ ኢዛ ቦላ ዳንዲሺንካ ገምቤዛ ገምቤቴላ 6:1-3

ዲኤቴሳፌ ሲሚዳይታ 7:4-73

ኢዝራይ ጸሳ ዎጋ ዳራሰ ናባቢን አሳይ ዳሴ ባኣሌ ቦንቺዳ ቦንቺ 8:1-18

ዳሬዚ ባ ናጋራ ፓጺላ 9:1-37

አሳይ ጸሳ ዎጋሰ አዛዜታናሰ ዶሲ ዉሌ ፓራሚዳሰ 9:38—10:39

ዩሁዳኒኔ ዩሩሳላሜን ዲዛ አሳታ 11:1-36

ዲኤቴሳፌ ሲሚዳ ቄሴታኔ ሌዌ ዛርኬታ 12:1-26

ናሂሚያይ ካታማ ገምቤዛ አንጂሴላ 12:27-47

ናሂሚያይ ኤሂዳ ላሜ 13:1-31

ናሂሚያ ዎሳ

1 ሃካሊያ ና ናሂሚያይ ሃሳይዳ ቃላይ ሃይሳፌ ካሊ ዲዛይሳ፤ አርጾኪሲሲ ፓሪሴ ዴሬን ካዎቲዳ ናምኡ ታማንላ ላይላን ኪሶሌ * ጌቲቲ ጸይጌቲዛ አገናን ታ ናሂሚያይ ዋና ካታማ ሱሳን ዳይሰ።

2 ታ አሻታፔ ኢሲ ሃናኒያ ጌቲቲዛይሲ ሃራ አሳታ ካሌሊዲ ዩሁዳፔ ታኮ ዩዴሰ፤ ታኒ ኢስታ ዩሩሳላሜ ገሻሲኔ ዲኤቲዲ ባቢሎኔ ቦንታ ሄን አቲዳ አሳ ገሻሰ አይቻዲሰ።

3 ኢስቲካ ታሰ፡ «ዲኤቲዲ ባቢሎኔ ቢታ ቦንታ አቲዳ አይሁዳቲ ጌታ ሜቶኒኔ ዋዬ ጌዶን ዴቲሰ፤ ዩሩሳላሜ ጊምቤቲ ላሌቲዲ ኩንዲዳ፤ ቃሴ ጊምቤዛ ጎርዲዛ ፔንጌቲ ታማን ጸጌቲዳ» ጌዳ።

4 ሃይሳ ኡባ ሲዩዳፔ ጉዬ ኡታዳ ዩካዲሰ፤ ዳሮ ጋላሰ ጸማኒኔ ሙዙቲላን ጋምኣዳ ጸሳ ሂዝጋ ዋሳዲሰ።

5 «ሳሎ ጎዳወ! ኔና ዶሲዛይታራኔ ኔ አዛዙ ናጊዛይታራ ሜርናሰ ኔኒ ኔ ጫቆ ቃላ ናጊዛ ጌታኔ ያሺሲዛ ጸሳ።

6 ጸሳወ! ኔ አይሌ ጌዲዳ ኢሰራኤሌ አሳሰ ኪያና ማላ ጋላሲኔ ኦማርሰ ታ ዋሲዛ ዋሳ ሲያ፤ ታናካ ቆፓ፤ ኑኒ ኢሰራኤሌ አሳይ ኦሊዳ ናጋራ ታኒ ኔሰ ፓጻይሰ፤ ቱማፔ ታኒኔ ካሴ ኑ አዋቲ ናጋራ ኦሊዶሰ።

7 ኔኒ ኔ አይሌ ሙሴሰ ኢሚዳ አዛዘዛኔ ዋጋዛ ኑኒ ናጎንታ አገዳ ገሻሰ ኔና ቆሂዶሰ።

8-9 «ኔ ሙሴሰ፡ ሲንቴኖ ኢሰራኤሌ አሳወ! ኢንቴ ታና አማኖን ካሎንታ አገኮ ታኒ ኢንቴና ካዎቲላታ ጌዶን ላላና፤ ጌዶ አቲን ኢንቴ ታኮ ሲሚዲ ታ አዛዘ ፖሊዛ ጌዲኮ ታ ኢንቴና ቢታ ጋጸን ኢንቴ ላሌቲዳ ጌዲኮካ ታ ሱንላይ ጸይጌታና ማላ ታ ዶሪዳሶ ሺሻዳ ዛራ ታ ኤሃና፤ ጋዳ ዮቲዳ ቃላ ቆፓ።

10 «ጸሳወ! ሃይቲ ሃይሳፌ ካሴ ኔኒ ኔ ጌታ ዋልቃኒኔ ሚኖ ቄሴን ዋዚዳ ኔ ኦሳንቻታኔ ኔ ዴሬታ።

11 ጎዳወ! ሃኢካ ታ ዋሲዛ ዋሳ ሲያ፤ ኔና ዶሲዲ ቦንቻና ኮይዛ ኦሳንቻታ ዋሳ ኤዘጋ፤ ቃሴ ሃይሳ ካዋዛ ሲንላን ታሰ ቱማቴሰ አማዳ ሃኙ ታኒ ኔ ኦሳንቻዚ ኦላና ኮይዛይሳ ታሰ ፖሊሳ።»

ታኒ ሄ ዋዴ ካዋሶን ዋይኔ ኡሹ ጋሴሊዛ አሳ።

* 1:1 ኪሶሌ፡ ኪሶሌ ጌቲቲዛይሲ አብራዌታ አገና ቆዳን ኡዴፋንላ አገና ጌዲሺን ኑ ታይሶን ሂዳሬ አገና ባጋሬ ቢዲ ቲሳሴ አገና ባጋ ጋካና ዲዛይሳ ቤሴሰ። 1:8-9 ሌዌ 26:33፤ ዛሬ 30:1-5

2

ናሂሚያ ዩሩሳሌም ቡስ

1-2 ካዋ እርጾኪሲሲ ካዋቲዳ ናምኡ ታማንሉ ላይላን ኒሳኔ * ጌቲቲዛ እገናን ጋላሳታፔ ኢሲ ጋላስ ካዋዛስ ዋይኔፔ ኦሴቲዳ ኡሹ ዱቃ ኢማዲስ፤ ሄ ዋዴፔ ኣቲን ካሴ ታ ጩጪሺን ካዋዚ ቤዪ ኤሮንታ ገሻስ፡ «ኢሲ ሜቶይ ኔ ቦላ ጋኪን ኣቲን ሳኬቶንታ ጮ ማላ ኔ ኣይፌሶይ ዋኒ ላማቲዳ?» ጊ ኦይቺዴስ፡፡

3 ታኒካ ኬሃ ባባሹ፡ «ካዋ! ኔ ሜርናስ ካዋታ! ካሴ ኦ ኣዋቲ ኢዛን ሞጌቲዳ ካታማይ ላሌቲዲኔ ሄ ካታማ ገምቤ ፔንጌይ ታማን ጸጌቲ ቆይሺን ታኒ ዋናዳ ጩጪኪና!» ጋዲስ፡፡

4 ካዋዚ ታና፡ «ሂስቲን ሃኢ ኔ ኮይዛይ ኣዜ?» ጊ ኦይቺዴስ፤ ታኒካ ሳሎ ጸሳኮ ዋሲዳፔ ጉዬ፡፡

5 ካዋስ፡ «ካዋ! ታኒ ኔና ኡፋይሲዛ ጊዲኮ ቃሴ ታ ኦይሾ ኔ ኤኪዛ ጊዲኮ ካሴ ታ ኣዋቲ ሞጌቲዳሶ ዩሁዳ ዴሬ ባዳ ሄ ካታማዮ ዛራዳ ኬጸና ማላ ታና ዩዳርኪ» ጋ ዋሳይስ፡፡

6 ሄ ዋዴ ካዋ ማቼያ ኢዛ ማታን ኡታ ዲሺን ካዋዚ ታና፡ «ኔ ባና ኦጌይ ኣፑን ጋላስ ዉርሳኔ? ቃሴ ኔ ኣይ ዋዴ ሲማኔ?» ጊ ኦይቺን ታኒ ኣፑን ጋላስ ጋምኣናኮኔ ኣይዴ ሲማናኮ ዮታዲስ፡፡

7 ሄሳፌ ጉዬ ታ ዩሁዳ ዴሬ ፒና ባና ማላ ኤፊራጺሴ ሻፋፔ ኣርሼይ ዉሊዛ ባጋራ ዲዛ ዴሬ ኣይሲዛይታስ፡ «ኣቋ ቦ» ጊዛ ዳብዳቤይ ታስ ጸፊቲ ኢማታና ማላ ካዋዛ ዋሳዲስ፤

8 ካዋ ዋራ ናጊዛ ኣሳፌ ጌቲቲዛዴይ ጸሳ ኬፋ ገምቤ ፔንጌታስ፡ ካታማ ገምቤ ፔንጌታሲኔ ታ ኢዛን ዴኣናሶ ኬጸናስ ሚሉ ቃንጺሺን ዲሳንታ ማላ ኣዛዚዛ ዳብዳቤ ታስ ኢማና ማላ ኦይቻዲስ፤ ጸሳ ኪያቴሉ ታናራ ዲዛ ገሻስ ካዋዛ ታ ኦይቺዳ ኡባ ኢማዲስ፡፡

9 ካዋዚ ኣማርዳ ኦላ ሞኮኔቲኔ ፓራን ኦሌቲዛይቲ ታናራ ባና ማላ ኪቲዴስ፤ ታኒ ኤፊራጺሴ ሻፋ ፒንላን ኣርሼይ ዉሊዛ ባጋራ ዲዛ ዴሬ ኣይሲዛይታኮ ጋኪዳ ማላ ካዋዚ ዩዲዳ ዳብዳቤዛ ኢማዲስ፡፡

10 ጊዳ ኣቲን ቤቲ-ሆሮኔ ካታማ ኣስ ጊዲዳ ሳንባላጾይኔ ኣሞኔ ዴሬ ኣይሲዛ ጸቢያይ ኢሰራኤሌ ዴራ ሳርቴላስ ሎኦ ሚሽ ኦሊዛ ኣሲ ዩዲይሳ ሲዩዲ ኬሂ ሃንቄቲዳ፡፡

* 2:1-2 ኒሳኔ፡ ኒሳኔ ጌቲቲዛይሲ ኦ እገና ቆዳን ማዚያ እገና ቤሴስ፡፡ 2:3 2ካዋ 25:8-10፤ 2ታሪ 36:19፤ ኤር 52:12-14

ናሂሚያይ ዩሩሳላሜ ካታማ ገምቤዛ የዪ ደሎ

11 ታኒካ ዩሩሳላሜ ባዳ ሄ፹ ጋለስ ጋምኢዳፔ ጉዬ፥

12 ዩሩሳላሜ ካታማን ታ ኦላናይሳ ጸሲ ታስ ቆንጨሲዳይሳ ታ ኦናሰካ ዮቶንታ ታ ዎዚናን ኦይካ ጋምኢዳፔ ጉዬ ጉላ አሳታ ታናራ ካሌላ ኤካዳ ኦማርሳፌ ጊዲ ጊዶላ ባዲሰ፤ ሄ ዎዴ ኑስ ዲዛ ቶጋ ሜሄይ ታ ቶጊዳይሳፌ ሃራይ ባዋ።

13 ጊዶላ ዙሌ † ፔንጌራ ኬዛዳ ዳዌ ፑልቶ ጌቴቴዛሶራ ፒናዳ ዲጌ ባጋን ቡራ ዩጊዛሶራ ኦቶ ባሽ ላሌቴዳ ካታማኔ ታማን ኤዲ ላይዳ ገምቤ ፔንጌታ ቤያዲሰ።

14 ሄሳፌ ጉዬ ካላዳ ኦርሼይ ሞኪዛሶስ ፑዴሃ ባጋራ ዲዛ፥ «ፑልቶ ሃላ ገምቤ ፔንጌ» ጌቴቴዛሶራ ካዎ ኤሌ ሃላኮ ባዲሰ፤ ጊዶ ኦቲን ታኒ ቶጊዳ ቶጋ ሜሄይ ላሌቴዳ ገምባ ላሌላ ቦላራ ኦቲ ቢዛ ኦጌይ ዳና።

15 ሄሳ ጊሻስ ኦማርስ ቄዲሮኔ ሻፋ ዎቶዳ ገምቤታ ጸላሽ ባዲሰ፤ ዉርሴላን ካሴ ታ ዩዳ ኦጌዛራ ጉዬ ሲማዳ ሾባ ገምቤ ፔንጌ ባጋራ ካታማ ሲማ ጌላዲሰ።

16 ዴራን ዲዛ ዳናታፔ ኢሳዴይካ ታ ኦዋ ቢዳኮ ኦይ ኦሊዳኮ ኤራዳይ ኦኒካ ዳና፤ ሃራይ ኦቶሺን ኦይሁዳታፔ ቄሴታስ፥ ካሌሊዛይታስ፥ ዳናታስ ዎይኮ ታናራ ኦሊዛ ሃራ ኦሳታፔ ኦናሰካ ኦይኮካ ዮታቤኬ።

17 ሃይሳፌ ጉዬ፥ «ኦኔ ኑስ ዲዛ ሜቶ ጸሊቴ! ዩሩሳላሜይ ላሌቴዳ ላሌሊ ዶሬ ጊዲዴሰ፤ ኢዚ ገምቤዛ ፔንጌቴካ ታማን ጸጌቲ ላይዳ፤ ሄሳ ጊሻስ ኦኔ ዴንዲዲ ካታማዛ ገምቤ ዛሪ ገምቦሰ፤ ኑ ቦላ ጋኪዳ ዩላቴላካ ኦኔ ዲሳስ» ጋዲሰ።

18 ቃሴ ጸሳ ኪያቴሊ ታናራ ዲዛይሳኔ ኢዚ ታና ዎስቲ ማዲዳኮ ካዎዚ ታስ ዮቴዳይሳ ኡባ ታ ኢስታስ ዮታዲሰ፤ ኢስቲ «ኦኔ ቃሴካ ዛሪ ኦሶስ!» ጊዳፔ ጉዬ፥ ኦሶ ኦላና ጊጌቲዳ።

19 ጊዶ ኦቲን ሆሮኔ ኦስ ሳንባላጼይ፥ ኦሞኔ ዴሬ ሹሜ ጸቢያይኔ ኦራቤ ዴሬ ኦስ ጌሻሜይ ኑ ኦሶስ ኬሲዳ ቆፋታ ሲዩዳ ዎዴ ኑ ቦላ ናጨ ‡ ሚጨሼ፥ «ሃይሲ ኢንቴ ኦሊዛይሲ ኦዜ? ዎይኮ ካዎዛ ቦላ ማካላና ኮዩቲ?» ጊ ኦይቺዳ።

20 ታኒካ፥ «ኑ ኦሊዛ ኦሶዛን ሳሎ ጸሲ ኑና ማዳና፤ ሄሳ ጊሻስ ኑኒ ኢዛ ኦሳንቻቲ ዴንዲዲ ኦላና፤ ኢንቴሰ ጊዲኮ ዩሩሳላሜን

† 2:13 ዙሌ፡ ዙሌ ጉሲ ናምኡ ባጋራ ቶቄ ጊዲ ዲዛ ዙማታስ ጊዶን ዘቂ ጊ ኡቲዳሶ። ‡ 2:19 ናጨ፡ ናጨ ጉሲ ሚራን ኦስ ቂዶ ዎይኮ ቄሴ ሚንሉ ጉሳ

አይ መሻገካ እንቴና ጋሊዛ ዋጋይን እንቴ ቆፊታና ታሪኬይ እንቴሰ ደና! » ጋ ኢስታሰ ዛራዲሰ።

3

ዬሩሳሌም ካታማ ዲርሳ ዛሬሊ ጊምቤል

1 ካታማዛ ዲርሳይ ጊምቤቲዳይ ሃይሳፌ ካሊ ዲዛይሳ ማላ፤ ቄሴታ ሃላቃ ኤልያሹቤይን ኢዛራ ኦሊዛ ቄሴቲ፤ «ዶርሳታ ፔንጌ» ጌቲቲዛ ጊምቤ ፔንጌዛ ዛሪ ጊምቤዲ ጸሳሰ ዲማሲዳ፤ ኢዛሰ ፔንጌታካ ጊግሲዳ፤ ጊምቤዛካ «ጸቱ» ጌቲቲ ጸይጌቲዛ ናጌሶ ጊምቤዛን «ሃናኒኤሌ ጊምቤ» ጌቲቲ ጸይጌቲዛ ሻኮ ጊምቤዛኮ ጋካናሰ ጸሳሰ ዲማሲዳ። *

2 ኢዛፔ ካሊ ዲዛይሳ ኢያርኮ ኣሳቲ ኦሊሺን ኢዛፔ ካሊዛይሳ ኢሚሬ ና ዛኩሬይ ዛሪ ኦሊዳሰ።

3 ሃሲናኣ ዜሬፋቲ ሞሌ ጊምቤ ፔንጌ ጌቲቲዛሶ ዛሪ ኦሊዳ፤ ቱሳታካ ኤሲዳ፤ ፔንጌታካ ጌልሊዳ፤ ፔንጌታ ጎርዲዛ ቁልፔታን ኮላታታ ጊግሲዳ።

4 ኢዛፔ ካሊ ዲዛይሳ ሃቆጾ ናዛ ና ኡሪያ ና ማርሞቲይ ዛሪ ኦሊዳሰ፤ ካሊ ዲዛይሳ ማሹዛቤሌ ናዛ ና ባራካዬ ና ማሹላሚይ ዛሪ ኦሊዳሰ፤ ኢዛፔ ካሊ ዲዛይሳ ባኣና ና ሳዶቄይ ዛሪ ኦሊዳሰ።

5 ኢዛፔ ካሊ ዲዛይሳ ቱቁሄ ካታማ ኣሳቲ ዛሪ ኦሊዳ፤ ጊዶ ኣቲን ሄ ካታማን ዲዛ ሹሜቲ ኢስታ ኦሲሲዛ ኣሳቲ ኢስታሰ ጊሻ ኢሚዳ ኦሶዛ፤ «ኦሶኮ!» ጊ ኢጲዳ።

6 ፋሳሄ ና ዮያዳኤይን ቤሲዲያ ና ማሹላሚይ ዪሻኔ ጋልኣ ጊምቤ ፔንጌ ዛሪ ኦሊዳ፤ ቃሴ ቱሳታካ ኤሲዳ፤ ፔንጌ ጌልሊዳ፤ ፔንጌታሰ ቁልፔታን ኮላታታ † ጌልሊዳ።

7 ሄሳፌ ካሊ ዲዛይሳ ጌባኦን ካታማ ኣሰ ማላጲያራን ማርኖቲ ዴሬ ኣሰ ያዶኔራ ዛሪ ኦሊዳ። ቃሴካ ጌባኦኔን ሚጲጳ ካታማ ኣሳቲካ ኢስታራ ኢሲፌ ጊዲዲ ኤፊራጲሴ ሻፋ ፒንፋን ኣርሼይ ዉሊዛ ባጋራ ዲዛ ዴሬ ኣይሲዛይ ዴኢዛሶ ጋካናሰ ዲዛይሳ ዛሪ ጊምቤዳ።

8 ኢዛፔ ካሊ ዲዛይሳ ዋርቃ ቆጲዛ ሃርሃያ ና ኡዚኤሌይ ዛሪ ኦሊዳሰ፤ ካሊ ዲዛይሳ ሺቶ ኬሲዛ ሃናኒያይ ዛሪ ኦሊዳሰ፤ ሃ ኣሳቲ ዬሩሳሌምን፤ «ኣሆ ጊምቤ» ጌቲቲዛሶ ጋካናሰ ዲዛይሳ ኡባ ዛሪ ኦሊዳ።

* 3:1 ሻኮ ጌቲቲዛይሲ ኢሲ ኢሲ ባጋ ጋሞላ ቃላን ሴላ ጌቲቲሰ። † 3:6 ኮላታታ፡ ኮላታታ ጌቲቲዛይሲ ኢሲ ኢሲ ባጋ ጋሞላ ቃላን ኮልጌ ዋይኮ ኮሌ ዋይኮ ጎልጌ ጌቲቲሰ።

9 እስታፊ ካሊ ዲዛይሳ ኦሊዲይ ዩሩሳሌም ዋራዳ ሄካ ባጋ ሻኪ እይሲዛ ኡሬ ና ኤራፋያይ ዛሪ ኦሊዲስ።

10 ሃሩማፊ ና ዩዳያይ ባ ኬላ ፔንጌ ጊናን ዲዛይሳ ዛሪ ኦሊዲስ፤ ካሊ ዲዛይሳ ሃሻቢናዬ ና ሃጹሼይ ዛሪ ኦሊዲስ።

11 ሃሪሜ ና ማልኪያይኔ ፓሃቲ-ሞኣቤ ና ሃሹቤይ ሄሳፊ ካሊ ዲዛይሳ፤ «ኢቶኔ ገምቤ» ጌቲቲ ጸይጌቲዛይሳ ዛሪ ኦሊዲ።

12 ዩሩሳሌም ዋራዳስ ኦቲዳ ሄካ ባጋ እይሲዛ ሃሉሄሼ ና ሻሎሜይ ካሊ ዲዛይሳ ዛሪ ኦሊሺን ኢዛ ማጫ ናይቲ ኢዛ ማዲዲ።

13 ሃናኔኒ ዛናሄን ዲዛ ኣሳይ ኢሲፊ ማዴቲዲ ዙሌ ገምቤ ፔንጌ ዛሪ ኦሊዲ፤ ቃሴ ኢዛስ ፔንጌታ ጌልሊዲ፤ ቁልፔታኔ ኮላታታ ጌልሊዲ፤ ቡራ ዩጌላሶ ጋካናስ ኣዱሳቲላይ 1,000 ዋቋ ጊዲዳ ገምቤ ዛሪ ኦሊዲ።

14 ቤቲ-ሃካሪሜ ዋራዳ እይሲዛ ኤሬካቤ ና ማልኪያይ፤ «ቡራ ዩጌዛ ገምቤ ፔንጌ» ጌቲቲዛይሳ ዛሪ ኦሊዲስ፤ ቃሴ ኢዛስ ፔንጌታ ጌልሊዲስ፤ ፔንጌታሰካ ቁልፔኔ ኮላታታ ጌልሊዲስ።

15 ሚጺጸ ዋራዳ እይሲዛ ኮሊ-ሆዜ ና ሻሎሜይ፤ «ፑልቶ ሃላ ገምቤ ፔንጌ» ጌቲቲዛ ገምቤዛ ዛሪ ኦሊዲስ፤ ቃሴ ኢዛስ ካማ ኦሊዳፔ ጉዬ ጎርዲዛ ፔንጌታ ጌልሊዲስ፤ ፔንጌታሰካ ቁልፔታኔ ኮላታታ ጌልሊዲስ፤ ሼላሄ ኤሌ ሃላ ባጋራ ካዋ ኣታኪልቲሶፔ ኦይኪዲ ካዋ ዳዊቲ ካታማ ጋካናስ ዋቋ ቢዛ ኬላ ዛሪ ኬሊዲስ።

16 ቤቲ-ጸሬ ዋራዳ ሄካ ባጋ እይሲዛ ኣዚቡቄ ና ናሂሚያይ ዳዊቲ ዲፎሶ ጋካናስ፤ ኤሌ ሃላ ጌቲቲዛሶዛ ጋካናሲኔ ኦላ ቃራቲ ዲዛሶ ጋካናስ ዲዛይሳ ዛሪ ኦሊዲስ።

ገምባ ኦሶን ቤቲዳ ሌዌታ ዛርኬታ

17 ገምቤዛ ኦሶን ዲዛ ሌዌ ዜሬላታ ሱንሊ ሃይሳፊ ካሊ ዲዛይሳ፤ ባኔ ና ኤሬሁሜይ ኢዛፔ ካሊ ዲዛይሳ ዛሪ ኦሊዲስ፤ ቃሴ ቂኢላ ዋራዳ ሄካ ባጋ እይሲዛ ሃሻቢያይ ባ ዋራዳ ሱንላን ካሊ ዲዛይሳ ዛሪ ኦሊዲስ።

18 ሄሳፊ ካሊ ዲዛይሳ ሃንኮ ኦቲዳ ቂኢላ ዋራዳስ ሄካ ባጋ እይሲዛ ሄናዳዴ ና ባዌይ ዛሪ ኦሊዲስ።

19 ሚጺጸ ዋራዳ እይሲዛ ኢያሶ ና ኤዜሬይ ኦላ ሚሻታ ዋሊዛ ኬላ ሲንላ ባጋን ዲዛይሳፊ ቢዲ ገምቤዛስ ጉላ ጋካናስ ዲዛይሳ ኡባ ዛሪ ኦሊዲስ።

20 ዛካዬ ና ባሮኬይ ዋና ቂሴ ኤልያሼቤሶ ፔንጌ ጋካናስ ዲዛይሳ ዛሪ ኦሊዲስ።

21 ሃቆጼስ ናዛ ና ጊዲዳ ኡሪያ ና ሜርሞቴይ ኤልያሹቤ ፔንጌፌ ቢዲ ኢዛ ኬላ ፌርሴል ጋካናስ ዲዛይሳ ዛሪ ኦሊዴስ።

ካታማ ዲርሳ ኦሊዳ ቄሴታ

22 ሄሳፌ ካሊ ዲዛ ጊምቤዛ ዬሩሳላሜ ዩሾን ዲዛ ቄሴቲ ዛሪ ኦሊዳ።

23 ኢስታፌ ካሊዛይሳ ቢኒያሜይኔ ሃሹቤይ ባንታ ኬላ ሲንሳራ ዲዛ ጊምቤዛ ዛሪ ኦሊዳ፤ ቃሴ ኣናኒያ ናዛ ና ማኢሳያ ና ኣዛሪያሲ ባ ኬላ ሲንሳ ባጋራ ዲዛ ጊምቤዛ ዛሪ ኦሊዴስ።

24 ሄናዳዴ ና ቢኑዌይ ኣዛሪያሳ ሶፔ ዶሚዲ ጊምቤዛ ጉላ ጋካናስ ዲዛይሳ ዛሪ ኦሊዴስ።

25 ኡጻዬ ና ፓላሌይ ጊምቤዛ ጉላፔ ቢዲ ዛቤ ናጌሶ ማታን ፑዴ ባጋራ ዲዛ ካዎ ኬላ ጊምቤ ሲንሳ ጋካናስ ዲዛይሳ ኡባ ዛሪ ኦሊዴስ።

26 ሄሳፌ ካሊ ዲዛይሳ ፓሮሴ ና ፓዳያይ፡ «ኦፌሌ» ዙዎቡላን ዲዛ ጸሳ ኬላ ኦሳንቻቲ ሃላ ፔንጌ ጌቲቲዛሶፔ ቢዲ ኣርሼይ ኬዚዛ ባጋ ጋካናስ ዲዛ ጊምቤዛ ዛሪ ኦሊዴስ።

ኢስታራ ኢሲፌ ኦሊዳ ኦሳንቻታ

27 ሄሳፌ ካሊ ዲዛይሳ ቴቁሄ ኣሳይ ሃራ ቃሴካ ጸሳ ኬላ ናጌስ ኦሴቲዳ ጌታ ጊምቤፌ ዶሚዲ፡ «ኦፌሌ» ማታን ዲዛ ጊምቤ ጋካናስ ዲዛይሳ ዛሪ ኦሊዳ።

28 ሃንኮ ቄሴቲ ኢሶይ ኢሶይ ባ ኬላ ፔንጌን ዲዛይሳ ካሊ ካሊዲ ፓራ ጊምቤ ፔንጌ ጌቲቲዛሶፔ ፑዴ ባጋራ ዲዛይሳ ዛሪ ኦሊዳ።

29 ኢሜሬ ና ሳዶቄይ ባ ኬላ ሲንሳን ዲዛይሳ ኦሊሺን ኣርሼይ ሞኪዛ ባጋራ ዲዛ ጊምቤዛ ፔንጌ ናጊዛ ሻካኒያ ና ሻማኤይ ካሊ ዲዛይሳ ዛሪ ኦሊዴስ።

30 ሹሌሚያ ና ሃናኒያይኔ ጸላፌስ ኡሱፑንሳ ና ሃናኔይ ኢስታስ ናምኣንላ ዩሾ ኢሜቲዳይሳ ዛሪ ኦሊዳ። ባራካዬ ና ማሹላሜይ ባ ኬላስ ሲንሳ ባጋራ ዲዛይሳ ዛሪ ኦሊዴስ።

31 ሄሳፌ ካሊ ዲዛይሳ ዎርቃ ቆጶዛ ማልኪያይ ጊምቤዛ ጉላፔ ዶሚዲ ፑዴ ጼራ ባጋራ ዲዛሶ ጋካናስ ዛሪ ኦሊዴስ፤ ቃሴካ ሄ ናጊዛሶ ፔንጌ ጌቲቲዛሶ ባጋራ ጸሳ ኬላ ኦሳንቻቲኔ ዛልኣንቻቲ ጎኤቲዛሶ ጋካናስ ዲዛይሳ ዛሪ ኦሊዴስ።

32 ዎርቃ ቆጶዛ ኣሳቲኔ ዛልኣንቻቲ ጊምቤዛ ጉላፔ ዶሚዲ ዶርሳታ ፔንጌ ጌቲቲዛሶ ጋካናስ ዲዛይሳ ዛሪ ኦሊዳ።

4

ገምቤዛ ኦሶስ ቆጶ ጊዲዳ አሳታራ ኤቄቴል

1 ኑኒ ገምቤዛ ኦሶ ዶሚዳይሳ ሳንባላጾይ ሲዱዲ ኬሂ ዪሎቴዲ ኑና ናጫናሰ ዳንዲዳሰ።

2 ባ ላጌታኔ ሳማሪያ ዋታዳራታ ሲንፋን፣ «ሃይቲ ላፋ አይሁዳቲ አይ ኦፋና ቆፒዶ? ባ ካታማ ገምቤዛ ዛሪ ኦፋና ቆፒድ? ያርቮ ሺሻናሰ ኮዪዛ? ኦሶዛ ኢሲ ጋላሰ ፖላናሰ ኢስታሰ ሚሳቲዜ? ገምቤሰ ጊዲዛ ሹቻታ ካሴ ጸጌቲ ላሌቲዳ ገምቤ ጋርሳፌ ኬሲ ገምባናሰ ዳንዳይዛ?» ጊዲ ናጨዳሰ።

3 ኢዛ ማታን ኤቄዳ አሞኔ ዳሬ አሰ ጸቢያይ ባ ባጋራ፣ «ኢስቲ ዋኒዳ ገምቤ ገምባና ዳንዳይዛ? ኢስቲ ገምቢዳ ገምቤዛ ቦላ ሃራይ አቶሺን ዋራካናይ ኬዚዳኮ ላሌታና!» ጊዲ ናጨዳሰ።

4 ታኒካ፣ «ጎዳዉ! ኢስቲ ኑና አይ ማላ ናጨዛኮ ኔ ሃይሳ ቤያ፤ ኢስታ ጫሺ ጌዴ ኢስታ ቦላ ሲሞ፤ ኢስታሰ ዲዛ ሃርይ ቦንቄቲን አላጋ ቢታን ቤቲ አሰ ጊዴቶ!

5 ኢስቲ ኦሊዳ ኢታ ኦሶዛ ጊሻሰ ኔ ኢስታ ማርፓ፤ ላሌቲዳይሳ ኑኒ ዛሪ ኦሊዳ ጊሻሰ ኢስቲ ኑና ጫሻን ካወሺዳ ቆሆዛ ኔ ባሎፓ» ጋ ዋሳዲሰ።

6 አሳይ ዋዚናፔ ኦሊዛ ጊሻሰ ገምቤዛ ኦሶይ ኤሶራ ባጋ ጋኪዳሰ።

7 ሳንባላጾይ፣ ጸቢያይ፣ አራቤ ዳሬ አሳይ፣ አሞኔ ዳሬ አሳይኔ አሽዶዴ ዳሬ አሳይ ኡባይ ኑኒ ዬሩሳላሜ ገምቤዛ ዛሪ ሎኤሊ ኦሊዳ ገምቤታ ጊዶን አቲዳ ጸኤታ ኡባ ቱጨሺን ሲዱዲ ኬሂ ሃንቄቲዳ።

8 ሄሳ ጊሻሰ ኢስቲ ኢሲ ቦላ ጊዲዲ ዬሩሳላሜ ዪዲ ኦላናሲኔ ሜቶ ሜቶናሰ ኑ ቦላ ሴሪዳ።

9 ጊዶ አቲን ኑኒ ኑ ጎዳኮ ዋሲዶስ፤ ኦማርሲኔ ጋላሰ ኢስታራ ኤቄታናሰ ዳንዳይዛ አሳታ ዋሊዶስ።

10 ሄ ዋዴ ዩሁዳ አሳቲ፣ «ቶሆይ ኑና ኢጾሊዳስ፤ ቡሮ ኦሴታናሰ ቤሲዛሶይ ዳርይ ዳሰ፤ ሄሳ ጊሻሰ ገምቤዛ ኦፋናሰ ዳንዳዮኮ» ጊዳ።

11 ኑ ሞርኬቲ፣ «ኑ ኢስታ ጊዶ ጌሊዲ ኢስታ ዋዲዲ ኦሶዛ ቲቃና ጋካናሰ ኤሬቴናኔ ቤዬቴና» ጊ ቆፒዳ።

12 ኑ ሞርኬታ ማታን ዲዛ አይሁዳቲ ኑኮ ዪዲ ሞርኬቲ ኑና ኦላና ጊዛይሳ ኑስ ዛሪ ዛሪ ዮቲዳ።

13 ሄሳ ጊሻስ አሳ ጊደፌ ጊላ ማሻ፣ ቶራኔ ዋንዳፌ ኦይኪዳ አሳ፣ ዳቦፌ ዳቦፌ ጊጊሳዳ ጊምቤይ ኦሴቲ ፖሌቶንታሶስ ጉዬ ባጋራ ናጋና ማላ ኦላዲስ።

14 አሳይ ኬሂ ሂርጊዛይሳ ታኒ ቤያዳ ካሌሊዛይታ፣ ዳናታኔ ሃራ አሳታ ኡባ፣ «ባቦፍቴ! ያሺዛ ዋልቃማ ጸሳ ቆፒቴ! ኢንቴ ዳቦታስ፣ ናይታስ፣ ማቼታሲኔ ሃርታስ ኦሌቲቴ!» ጋዲስ።

15 ኑ ሞርኬቲ ኑና ቆሃና ጊዲ ባ ጋርሳን ሴሬቲ ጫቄቲዳይሲ ኑኮ ጋኪዳይሳ ሲዬዲኔ ጸሳይካ ኢስታ ቆፋ ሃዳ ኦሊዳይሳ ኢስቲ ኤሪዳፔ ጉዬ ኑኒ ኡባይ ጊምቤዛ ኑሶ ጌዴ ሲንሌ ጉጂዶስ።

16 ሄ ዋዴፔ ዶሚዲ ታ አሳታፔ ባጋቲ ኦሊሺን፣ ባጋቲ ቲራን ዋሊዛ ኦላ ማይኦ ማይኢዲ፣ ቶራ ኦይኪዲ፣ ጎንዳሌኔ ዋንዳፌ ኦይኪዲ ዛቤ ጊዲ ናጋና ማላ ኦላዲስ፤ ኦላ አሳ ካሌሊዛይቲ ዩሁዳ አሳፔ ጉዬራ ኤቁዲ ናጌቲስ።

17 ዲርሳ ጊምቤዛይታ ኡባ ሚንሌሌቲስ፤ ቶኪዛይቲካ ኢሲ ኩሼን ኦላ ማሳራ ኦይኪ ናጌቲሼ ሃንኮ ኩሻራ ኦሌቲስ።

18 ዲርሳ ጊምቤዛ አሳይ ወሪካ ኦሊሺ ባ ጊላ ማሻ ጊዲዲ ኦሌቲስ፤ ቃሴ ዛዬ ፑኒዛይሲ ታ ኦቻፌ ሻኬቲ ኤሪና።

19 ዴሪዛስ፣ ካሌሊዛይታሲኔ ሹሜታስ፣ «ጊምቤዛ ኦሶይ ኬሂ ጊታኔ አሆ ጊዲዳ ጊሻስ ኑኒ ኑ ጋርሳን ኢሶይ ኢሶይ ሃኪ ሃኪ ኦሊዛ ጊሻስ ኢሶይ ኢሳራ ጋይታናስ ዳንዳዬቲና።

20 ኢንቴ ዛዬይ ፑኔቲሺን ሲዬዳ ማላ ሃ ታኮ ሺቂቲ፤ ኑ ጎዳይ ኑ ጊሻስ ኦሌታና» ጋዲስ።

21 ሄሳ ጊሻስ ወሪ ማላዶ ዋንታ ዶሚዲ ኦማርስ ጸሊንቲይ ኬዛና ጋካናስ ባጋይ ኦሊሺን ባጋይ ቃሴ ኦላ ማሳራ ጊዲዲ ናጌስ።

22 ሄ ዋዴ ታኒ አሳስ፣ «ኦማርስ ናጊሼኔ ጋላስ ኑሶ ኦሊ ማዳና ማላ ኢሲ ኢሲ አሲ ባ ኦሳንቻራ ዬሩሳላሚን ጋምኦ» ጋዲስ።

23 ታኒ፣ ታ ላጌቲ፣ ዛቤቲ፣ ሃራ ኦሳንቻቲ ኡባይካ ኦማርስ ኑ ቦላፌ ማይኦ ቃሪ ኤርኮ፤ ቃሴ ሃላ ዱቃና ቢሼ ማሳራ ሃሼፔ ዋሊ ኤርኮ።

5

ማንቆታ ቦላ ጋኪዳ ቆሆ

1 ኢሲ ዋዴ ኦዴቲኔ ኢስታ ማቼቲ ባ ባጋ ጊዲዳ ኦይሁዳ አሳታ ሞሮ ጊሻስ ናሂሚያስ ኬሂ ዋሲዳ።

2 ኢስታ ጊደፌ ኢሲ ኢሲ አሳቲ፥ «ኑኒ ኑ ናይታራ ኢሲ ኢሲ ኩላን ዳሮ ኣሲ ዲዛ ገሻሰ ኑ ሼምፖ አሻናሰ ካል ኮዮስ» ጊዳ።

3 ቃሴካ ሃራቲ፥ «ኑ ቦላ ጋኪዳ ዋልቃማ ኮሻፔ ዴንዲዳይሳን ሼምፖ አሺዛ ካል ዴማና ጊዲ ኑስ ዲዛ ጋዴ፥ ዋይኔ አታኪልቴኔ ኑ ኬል ኡባ ኦይላና ጋኪደስ» ጊዳ።

4 ባጋይቲ ቃሴካ፥ «ኑ ጋዴ ገሻሲኔ ኑ አታኪልቴ ገሻሰ ካዋይ ኑና ገራ ኦይቲን ኢዛ ቃንጻናሰ አሳፔ ሚሽ ታልኢ ኤኪደስ፤

5 ኑ ዜሬሊኔ አይሁዳ ዜሬሊ ኢሲኖ፤ ኑ ናይታሲኔ ኢስታ ናይታሰ አይኮ ዲማቴሊካ ባዋ፤ ጊደ አቲን ኑ ዬሊዳ ናይታ ደሳይ ባይንዳ አይሌቴላሰ አሊ ኢሚደስ፤ ቃሴ ኑ ማጫ ናይታፔ ኢሲ ኢሲኖቲ አይሌ ጊዲዳ፤ ኑ ጋዴይኔ ዋይኔ አታኪልቴይ ኑፔ ኤኬቲዳ ገሻሰ ኑስ ዋልቃይ ባይንዳይታ ጊዲደስ» ጊዲ ባንታ ሚሻ ቃንጊዳ።

6 ታኒካ ኢስቲ ቃንጊዳ ቃላ ሲያዳ ኬሃ ሃንቄታዲስ።

7 ታኒ ኦላና ቤሲዛዝ ታ ዋዚናን ቃቻዳ ዴሬ ካሌሊዛይታ፥ «ሄኮ ኢንቴ ኢንቴ ኢሻታ ቆሂዲ ኢስታፌ ዲቕ ሜታ» ጋዳ ኬሃ ሃንቄታዲስ፤ ሄ ሜቶዛ ቢርሻናሰ ጋዳ አሳ ኢሲ ቦላ ሸሻዳ፥

8 «አይዛቤታስ ባይዜቲዳ ኢንቴ ባጋ ጊዲዳ አይሁዳታ ዋዛናሰ ኑስ ኑስ ዳንዳዬቲዳ ማላ ኦሊደስ፤ ጊደ አቲን ኢንቴ ኢንቴ ኢሻታ አይዛቤታስ አሊ ባይዜታ» ጋዳ ሃንቃዲስ፤ ካሌሊዛይቲካ ጋናዚ ቆዩን ጮኡ ጊዳ።

9 ቃሴካ ካሌላዳ ኢስታስ፥ «ሃይሲ ኢንቴ ኦሊዳ ኦሶዚ ዋጋ ጊዴና! ኢንቴ ጸሳስ ስዩዲ ሎኦ ኦሶ ኦላናሰ ቤሴስ፤ ሄሳሶ ኢንቴ ኦሊዳኮ ኑ ሞርኬ ጊዲዳ አይዛቤቲ ኑና ናጫናሰ ዳንዳዬቴናኮሺን።

10 ታኒ ታናራ ኦሊዛ ታ ላጌቲኔ ታስ ኦሊዛ ታ ኦሳንቻቲ አሳታሰ ሚሼ ጊዲን ዋይኮ ካል ጊዲን ታልኤ ኢሚደስ፤ ሄሳ ገሻሰ፥ ላኢቴ ታልኢ ኤኪዳይሳ ዲቻ ዛሪቴ፤ ጊ ኦይሾይ ኑፔ አቶ።

11 ኢንቴ ሚሽ ጊዲን፥ ካል ጊዲን ዋይኔኔ ዋጋራ ዛይቴ ጊዲን ኢስታሰ ኢንቴ ታልኢ ኢሚዳ ኡባ ዲቻ አጋጌቲ፤ ኢስታ ጋዴ፥ ዋይኔኔ ዋጋራ ዛይቴ፥ ኢስታ አታኪልቴኔ ኢስታ ኩላ ኡባ ኢስታሰ ኤሌሲ ዛሪቴ!» ጋዲስ።

12 ካሌሊዛይቲካ፥ «ኔ ኑና አዛዚዳ ማላ ኑ ኦላና፤ ኢስታፌ ኑ ኤኪዳ ሚሽ ኡባ ዛራና፤ ኑፔ ኢስቲ ታልኢዳ ሚሽ ኑስ ጨጌቲ ጊዲ ኦይቸኮ» ጊዳ። ታኒካ ታኮ ቄሴታ ጴይጋዳ፥ ካሌሊዛይቲ ባ ኦላና ጊዳ ቃላ ፖላናሰ ኢስቲ ጫቂሳና ማላ ኢስታሰ ዮታዲስ።

13 ሄሳፌ ጉዬ ታ ማይኢዳ ማይኦ ኬሳ ቆቆፋዳ፥ «አይ አሲካ አንቴ ጊዶፌ ባ ጌሊዳ ቃላ ፖሎንታ አጊዛ ጊዲኮ ጸሲ ኢዛ ኬሊኔ ሃሮ ሃይሳዳ ማላ አሾ!» ታ ጊን ሄን ዲዛ አሳይ ወሪ ኢሲ ቃላራ፥ «አሚን» ጊዲ ጸሳ ጋላቲዳሰ፤ ካሌሊዛይቲካ ባ ጫቂዳ ቃላ ፖሊዳ።

14 ካዎ አርጾኪሲሲ ካዎቲዳ ናምኡ ታማንሶ ላይሳፌ ደሚዲ ሄሹ ታማኔ ናምኡ ላይሳ ጋካናሰ ዲዛ 12 ላይሳታ ጊዶን ታኒ ዩሁዳ ዴሬ ኩሜል አይሲዛ አሰ ጊዳ ኡታዳ ታና ጊዲን ታ ዳቦታ ጊዲን ዴሬ አይሲዛዴሰ ቤሲዛ ሚሽ አይኮካ ጎኤቲቤኮ።

15 ቃሴካ ታፔ ካሴ ዴሬ አይሲዛይቲ ኡባይ ዴሪ ቦላ ጊታ ቶሆ ጊዲዲ ጋላሰ ጋላሰ ሚዛዚኔ ኡዪዛዚ ኢዛፔ አቲን ቦላራካ ኦይዱ ታሙ ሳቂሌ ቢራ ጨጊሲዳ፤ ሃራይ አቶሺን ኢሰታ አይሌቲካ ዴሪ ቦላ ኬሂ ጎዳቲዲ ዋዪሲዳ፤ ጊዶ አቲን ታኒ ጸሳሰ ያዪዛ ጊሻሰ ሄሳሶ ኦላቤኬ።

16 ታሰ ዲዛ ዋልቃ ኡባ ዬሩሳላሚ ጊምቤ ዛራ ጊምባናሰ አሚዲሰ አቲን ታሰ አይኮ ጋዴካ ሃራቤኬ፤ ታ ኦሳንቻቲካ ኡባይ ሄ ኦሶዛን ታናራ ኢሲፌ ኦሊዳ።

17 ኦ ማታን ዲዛ ካዎቴሳታፔ ዪዳ አሳቲ አቲን ታናራ ታ ካል ሚዛይቲ አይሁዳ አሳቲኔ ዴሬ ካሌሊዛይቲ ኢሲ ቦላ 150።

18 ጋላሰ ጋላሰ ኢሲ ቦራ፥ ዶሬቲዳ ኡሱፑን ዶርሰኔ ዳሮ ኩቶታ ሹካ ኢሰታሰ ሽሻይሰ፤ ቃሴካ ታሙ ጋላሳፌ ኢሲ ጋላሰ ሎኦ ዋይኔ ኡሹ ኢሰታሰ ጊሲሳይሰ፤ ጊዶ አቲን ዴሪ ቦላ ቶሆይ ዳሪዳይሳ ታ ኤሪዛ ጊሻሰ ዴሬ አይሲዛዴሰ ቤሲዛ ሚሽ ታሰ ኦይቻቤኬ።

19 ታ ጎዳዉ! ታኒ ሃ ዴራሰ ኦሊዳ ሎኦ ኦሶ ማላ ኔ ታሰ ኪያቴል ኦላ።

6

ናሂሚያ ቦላ ዴንዲዳ ሃራ ሴራ

1 ሳንባላጾይ፥ ጸቢያይ፥ አራቤ ዴሬ አሰ ጌሻሚይኔ ሃራ ኦ ሞርኬቲካ ታኒ ጊምቤዛ ጊምባ ወርሲዳይሳኔ ኦሴቶንታ አቲዳ ፓጩሶይ ባይንዳይሳ ሲዪዳ፤ ጊዶ አቲን ታኒ ቡሮ ጊምቤ ፔንጌታሰ ሳንቃታ ጌልላቤኬ።

2 ሄሳፌ ዴንዲዳይሳን ሳንባላጾይኔ ጌሻሚይ፥ «ኦኖ ዴምባን ኢሲ ሄራን ያዳ ኦናራ ጋይታ» ጊዲ ኪታ ታሰ ዬዲዳ፤ ኢሰቲ ሄሳ ጊዳይ ታ ቦላ ቆሆ ጋላናሳ።

3 ታኒካ፡ «ታስ ዳሮ ኦሶይ ዲዛ ገሻስ ኦሳ ኣጋዳ ኢንቲ ገዛሶ ባና ዳንዳይኬ፤ ታ ኣጋ ቢን ኦሶይ ኣይሰ ኤቁዜ?» ጋዳ ታኮ ከቲቲ ዪዳ ኣሳታሰ ዮታ ዬዳዲሰ።

4 ሄሳ ማላ ከታ ታስ ኢሰቲ ኦይዱቶ ዛሪ ዛሪ ከቲን ታኒካ ኢሰታሰ ካሴይሳዕ ዛሪ ዬዳዲሰ።

5 ቃሴካ ሳንባላጾይ ኢቻሻንዖ ዩሾ ባ ኣይሌታፔ ኢሳ ቦላ ማታሚይ ሾጩቶንታኔ ጮ ዶያ ዲዛ ዳብዳቤ ታስ ዬዳዲሰ።

6 ኢዚ ዬዲዳ ዳብዳቤዚ፡ «ኔኒኔ ኣይሁዳ ኣሳቲ ማካላቲል ዴንፊሳናሰ ቆፒዳይሳኔ ኢንቲ ገምቤዛ ገምቤዛይሲ ኑ ሄራን ዲዛ ካዋቲላ ኣቻን ዋሬቲዛይሳ ገሻሚይ ሲዪዲ ታስ ዮቲዴሰ፤ ቃሴ ኔ ካዋታና ቆፒዳይሳኔ

7 ኔ ዩሁዳ ካዋ ገዲዳይሳ ዬሩሳላሚን ኣሳይ ኣዋጃና ማላ ናቤታ ኔ ገግሲዳይሳ ገሻሚይ ታስ ዮቲዴሰ፤ ሄሳ ካዋዚ ሲያናይሲ ኤሬቲዳ ሚሽ ገዲዳ ገሻስ ታኒኔ ኔኒ ኢሲፌ ጋይቲዲ ሄ ዮኦዛ ቦላ ኑ ሃሳዬቲዳኮ ሎኦ» ጌሰ።

8 ታኒካ፡ «ሃይሲ ኔ ገዛይሲ ቱሙ ገዶንታ ኔኒ ኔፔ ሜቆ ኤኪዳ ዋርዶ ዮኦ» ጋ ዛራዲሰ።

9 ኡባይካ፡ «ኢሰታ ኩሼይ ኢጾቲኮ ኦሶይ ፖሌቶንታ ኣታና» ገዲ ታና ሂርገሳናሰ ፓጪዳ፤ ታኒ ገዲኮ፡ «ታ ጸሳዉ! ታ ዋዚና ኔኒ ሚንላ» ጋዳ ዋሳዲሰ።

10 ሄ ዋዴ ኢዛ ቦላ ኢዛ ኬላ ካሬይ ጎርዴቲን ዲዛ ማሄጸቢኤሌ ናዛ ና ዳላያ ና ሻሚያኮ ባዲሰ፤ ኢዚካ «ኔና ዋቆና ኦማርሳታፔ ኢሲ ኦማርሰ ዪዛ ገሻስ ታኒኔ ኔኒ ጸሳ ኬል ጌሊ ኑ ቦላ ፔንጌታ ጎርዲዲ ኣኔ ቆቴቶሰ» ገዴሰ።

11 ገዶ ኣቲን ታኒ፡ «ታ ማላ ኣሲ ባቃቲ ቆቴቲ ኤሪዜ? ታ ማላ ኣሲ ባ ሼምፖ ኣሻና ገዲ ጸሳ ኬል ጌሊ ቆቴታና ቤሲዜ? ሃይሳዕ ኡባካ ታ ሃኒኬ!» ጋ ዛራዲሰ።

12 ሃ ዞሬዛ ታ ዩሻ ቆፒሺን ሻማያይ ሃይሳ ማላ ዋርዶ ዮኦ ታስ ዮታና ማላ ጸቢያይኔ ሳንባላጾይ ሚሻን ኢዛ ባሌሲዳ ገሻስ ኣቲን ኢዚ ጸሳፌ ከቲቲዳ ኣሰ ገዶንታይሳ ታ ሻካ ኤራዲሰ።

13 ኢዚ ሚሻን ሻማቲዲ ሄሳዕ ኦሊዳይ ታና ባቢሲዲ ናጋራ ኦሲሳናሲኔ ታ ሱንል ሞሬታና ማላ ኮዪዳ ገሻሳ።

14 ታኒካ፡ «ጸሳዉ! ጸቢያይኔ ሳንባላጾይ ኦሊዳይሳ ኔ ቤያ፤ ቃሴ ኢሰታ ቦላካ ኔ ፒርዳ፤ ኖኦዶ ጌቲቲዛ ማጫሳ ናቤያኔ ሃራ ዋርዶ ናቤቲ ታና ባቢሳና ገዲ ኦሊዳ ኦሶ ኡባ ኔ ቆፓ» ጋዳ ዋሳዲሰ።

ዲርሳ ገምቤ ገሳ

15 ኦሶዚ ደሜቲዳፔ ኢቻሽ ታማኔ ናሞኣንሶ ጋላስ ኤሉሌ ጌቲቲዛ ኣገናይ ጌሊን ናሞኡ ታማኔ ኢቻሻንሳ ጋላስ ጊምቤዛ ኦሶ ኡባይ ኦሴቲ ገጊደሰ።

16 ኑ ዩሸን ዲዛ ካዎቲላ ጊደን ዲዛ ኑ ሞርኬቲ ኦሶዚ ጸሲ ማዲን ፖሊቲዳይሳ ሲዩዲ ኬሂ ሂርጊዲ ያዩዳ።

17 ሄ ዎዴ ዩሁዳ ዴሬ ካሌሊዛይቲ ጸቢያስ ዳር ዳብዳቤ ጸፊን ኢዚ ኢስታስ ዛር ጸፊደሰ።

18 ጋሶይካ ኣራሄ ና ሻካኒያይ ጸቢያ ቦሎ ጊዲዳ ገሻሲኔ ኢዛ ና ዩሆሃናኔይካ ባራካዬ ና ማሹላሚ ናዮ ማቾ ኤኪዳ ገሻሰ ዩሁዳ ዴሬፔ ዳር ኣሳይ ኢዛራ ጫቆ ቃላ ጌሊደሰ።

19 ሄ ኣሳቲ ጸቢያይ ኦሊዳ ሎኦ ኦሶታ ታ ሲንላንካ ናሺዳ፤ ታ ገዛይሳካ ኡባ ኢዛስ ኤፊ ኤፊ ዮቲቲሰ፤ ሄሳፌ ዴንዲዳይሳን ኢዚካ ታና ባቢሳና ጊዲ ዳብዳቤታ ዳር ዎዴ ዩዲደሰ።

7

1 ጊምባ ኦሶይ ኦሴቲ ገጊደሰ፤ ፔንጌ ሳንቃቲ ባ ዲዛሶን ዲዛሶን ጌሊዳ፤ ጸሳ ኬላ ናጊዛ ዛቤታስ፡ ዬላ ዩጸዛይታሲኔ ሌዌ ባጋታስ ኢስታ ገሻ ገሻ ኦሶይ ኢሜቲደሰ።

2 ታኒካ ዩሩሳላሚ ካታማ ኣይሳና ማላ ታ ኢሻ ሃናኔኔ ሚጸ ናጊዛ ሃናኒያ ዶራ ዎላዲሰ፤ ጸሎቴላኒኔ ጸሳስ ያሻቴላን ሃናኒያይ ማላይ ዴና።

3 ታ ኢስታስ ዩሩሳላሚ ጊምቤ ፔንጌቲ ጸልቄይ ኬዛና ጋካናስ ዶዬቶንታ ማላኔ ኣርሼይ ዉሊዛ ዎዴ ዛቤቲ ባሶ ባናፔ ሲንላን ጊምባ ፔንጌታ ሎኤሊ ጎርዳና ማላ ኣዛዛዲሰ፤ ቃሴካ ዩሩሳላሚን ዲዛ ኣሳ ጊዶፌ ናጊዛ ዛቤታ ዴሬይ ዶሪዲ ዎላና ማላ ኢስታፌ ባጋይታ ኢሲ ኢሲ ሄራስ ኣላፌ ኦሊ ዎላና ማላኔ ሃንኮ ኣቲዳይታ ባንታ ኬላ ካሬን ናጋና ማላ ዮታዲሰ።

ዲኤቴላፌ ሲሚዳ ኣሳታ ሱንሕ

4 ዩሩሳላሚይ ኣሆኔ ጊታ ካታማ፤ ጊዶ ኣቲን ኢዚን ዲዛ ኣሳ ቆዳይ ጉሕ ጊዲዳ ገሻሰ ዳር ኬላቲ ቡር ኬጾቲቤቴና።

5 ጸሳይ ዴሬዛ፡ ዴራ ኣይሲዛይታኔ ሹሜታ ታ ሽሻዳ ኢስታ ዩሌታ ዛርኬይ ዋኒ ዋኒ ጸፊቲዳኮ ታ ጸላና ማላ ታና ቆፍሲደሰ፤ ሄሳ ገሻሰ ካሴ ዲኤቴላፌ ሲሚዳ ኣሳታ ማዘጋባ ዴማዲሰ፤ ታ ዴሚዳ ማዘጋባይ ሃይሳፌ ካሊዛይሳ፤

6 ባቢሎኔ ካዎ ናቡካዳናጸሬይ ዲኢዲ ባ ዴሬ ኤፊዳ ኣሳታፔ ጉዬ ባ ካታማ ካታማ ዩሩሳላሚኔ ዩሁዳ ሲሚዳ ኣሳቲ ሃይሳፌ ካሊዛይታ፤

7 ኢስቲ ሲሚሺን ኢስታ ካሌሊ ኤሂዳ አሳቲ ዜሩባቤሌ፥
ኢያሶ፥ ናሂሚያ፥ አዛሪያሳ፥ ኤራኢሜ፥ ናሆሜ፥ ማርዲኪዮሳ፥
ባልሻኔ፥ ሚሲፋሬ፥ ቢጉዋዬ፥ ኑሁሜኔ ባኣና።

8 ዲኤቴላፌ ሲሚዳ ኢስራኤሌ አሳ ዛርኬፌ ጳፌቲዳ ዜሬላታ
ቆዳይ ሃይሳፌ ካሊዛይሳ፤ ፓሮሴ ዜሬላፌ 2,172፤

9 ሻፋጺያ ዜሬላፌ 372፤

10 አራሄ ዜሬላፌ 652፤

11 ኢያሶፔኔ ኢዮኣቤ ዜሬላ ጊዲዳ ፓሃቴ-ሞኣቤ ዜሬላቲ
2,818።

12 ኤላሜ ዜሬላፌ 1,254፤

13 ዛቶ ዜሬላፌ 845፤

14 ዛካዬ ዜሬላፌ 760፤

15 ቢኑዋ ዜሬላፌ 648፤

16 ቤባዬ ዜሬላፌ 628፤

17 እዝጋዴ ዜሬላፌ 2,322፤

18 አዶንቃሜ ዜሬላፌ 667፤

19 ቢጉዋዬ ዜሬላፌ 2,067፤

20 አዲኔ ዜሬላፌ 655፤

21 ሂዝቂያሳ ጌቲቲ ጴይጌቲዛ አጻሬ ዜሬላፌ 98፤

22 ሃሹሜ ዜሬላፌ 328፤

23 ቤሳዬ ዜሬላፌ 324፤

24 ሃርፔ ዜሬላፌ 102፤

25 ጌባኦኔ ዜሬላፌ 95፤

26 ካሴ ኢስታ አዋቲ ሃይሳፌ ካሊዛ ካታማታን ዲዛይቲ
ዲኤቴላፌ ሲሚዳ፤ ቤቴሊሄሜፔኔ ናጾፌ ዴሬ አሳታፔ 188፤

27 አናቶቲ ዴሬ አሳታፔ 128፤

28 ቤቲ-አዚሞቲ ዴሬ አሳታፔ 42፤

29 ቂሪያቴ-ጸኣሪሜ፥ ካፌሬኔ ቢኤሮቲ ዴሬ አሳታፔ 743

30 ኤራማፔኔ ጌባ ዴሬ አሳታፔ 621፤

31 ማኪማሴ ዴሬ አሳታፔ 122፤

32 ቤቴሌፔኔ አዬ ዴሬ አሳታፔ 123፤

33 ኔሶ ጌቲቲዛ ናሞኣንሶ ዴሬን ዲዛ አሳታፔ 52፤

34 ኤላሜ ጌቲቲዛ ናሞኣንሶ ዴሬን ዲዛ አሳታፔ 1,254፤

35 ሃሪሜ ዴሬ አሳታፔ 320፤

36 ኢያርኮ ዴሬ አሳታፔ 345፤

37 ሎዳ፥ ሃዲዴኒኔ ኦኖ ዴሬ አሳታፔ 721፤

38 ሳናኣ ዴሬ አሳታፔ 3,930።

39 ዲኤቴላፌ ሲሚዳ ቄሴታ ዜሬላቲ ሃይሳፌ ካሊ ዲዛይታ፤
ኢያሶ ዜሬላ ጊዲዳ ያዳያ ዜሬላፌ 973፤

40 ኢሜሬ ዜሬላፌ 1,052፤

41 ፓሽኩሬ ዜሬላፌ 1,247፤

42 ሃሪሜ ዜሬላፌ 1,017፡፡

43 ዲኤቴላፌ ሲሚዳ ሌዌ ዜሬላቲ ሃይሳፌ ካሊ ዲዛይታ፤
ሆዳዬ ዜሬላ ጊዲዳ ኢያሶፔኔ ቃዲሞኤሌ ዜሬላፌ 704፡፡

44 ዲኤቴላፌ ሲሚዳ ዬላ ዬዲዛይቲ ሃይሳፌ ካሊ ዲዛይታ፤
ኣሳፌ ዜሬላታፔ 148፡፡

45 ዲኤቴላፌ ሲሚዳ ጸሳ ኬላ ፔንጌ ናጊዛ ዛቤታ ዜሬላቲ
ሃይሳፌ ካሊ ዲዛይታ፤ ጸልሞኔ፣ ኣጻሬ፣ ሻሎሜ፣ ኣቁቤ፣ ሃጺጸኔ
ሾባዬ ዜሬላታፔ 138፡፡

46 ዲኤቴላፌ ሲሚዳ ጸሳ ኬላ ኦሳንቻታ ዜሬላቲ ሃይሳፌ ካሊ
ዲዛይታ፤ ጸሃ፣ ሃሱጸ፣ ጸባኦቲ፤

47 ቂሮቤ፣ ሲኣ፣ ፓዶኔ፤

48 ሊባና፣ ሃጋቤ፣ ሻሚላዬ፤

49 ሃናኔ፣ ጊዴሌ፣ ጋሃሬ፤

50 ኤራኣዬ፣ ኤራሶኔ፣ ኔቆዳ፤

51 ጋዛሜ፣ ኦዛ፣ ፋሳሄ፤

52 ቤሳዬ፣ ማኡኔ፣ ናፋሺሲሜ፤

53 ባቂቡቄ፣ ሃቁፋ፣ ሃሪሁሬ፤

54 ባጺልቲ፣ ማሂዳ፣ ሃርሻ፤

55 ባርቆሳ፣ ሲሳራ፣ ቲማሄ፤

56 ኔጺሃ፣ ሃጺፋ፡፡

57 ዲኤቴላፌ ሲሚዳ ሶሎሞኔ ኦሳንቻታ ዜሬላቲ ሃይሳፌ ካሊ
ዲዛይታ፤ ሶጸዬ፣ ሶፌሬቲ፣ ፔሪዳ፤

58 ያኢላ፣ ዳርቆኔ፣ ጊዴሌ፤

59 ሻፋጺያ፣ ሃጺላ፣ ፖኬሬቲ-ሃጺባሜኔ ኣሞኔ፡፡

60 ዲኤቴላፌ ሲሚዳ ጸሳ ኬላ ኦሳንቻታ ቆዳይኔ ሶሎሞኔ
ኦሳንቻታ ቆዳይ ኢሲ ቦላ 392፡፡

61-62 ቲሊ-ሜላ፣ ቲሊ-ሃርሻ፣ ኪሩቤ፣ ኣዶኔኔ ኢሜሬ ጌቲቲዛ
ጋጸሬ ካታማታፔ ሲሚዳይቲ ዳላያ፣ ጸቢያኔ ኔቆዳ ዜሬላታ ቆዳይ
ኢሲ ቦላ 642፤ ጊዶ ኣቲን ሄይቲ ኢስራኤሌ ዜሬላ
ጊዲዳይሳ ኤሪሳናስ ዳንዳይዛ ሚሺ ደና፡፡

63-64 ሃይሳፌ ካሊ ዲዛ ቄሴታ ዜሬላቲ ካሴ ባ ኣዋታ ዜሬላ
ዛርኬ ሻኪ ኤሪሳናስ ዳንዳይቤቲና፤ ኢስቲካ ሃባዬ፣ ሃቆጹ፣
ባርዚሌ፤ ቄሴታ ባጋ ጊዲዳ ባርዚሌዬስ ካሴ ኣዋይ ጋላኣዴ

ዳሬን ዩሌቲዳ ባርዚሌ ዜሬላፌ ኢሲ ማጫሳዮ ኤኪዳ ገሻሰ ባ ማቺይ አዋ ቆሞ ሱንላን ጸይጌታና ዳንዳይደሰ። ካሴ ባ አዋታ ዩሌታ ዛርኬ ሻኪ ኤሪሳናሰ ዳንዳዮንታ ኣጊዳ ገሻሰ ጌዮንታ ኣሳ ማላ ቆዴቲዲ ቄሴቲላን ኦላናሰ ዳንዳይቤቴና።

65 ሄሳ ገሻሰ ዩሁዳ ዳሬ ኣይሲዛይይ ኡሪሚኒኔ ቱሚሚን * ጸሳሰ ኦሊዛ ቄሴይ ዳንዳና ጋካናሰ ጸሳሰ ሸቂዛ ያርሾፌ፣ ካላፌ ኦኒካ ማናሰ ዳንዳዮንታይሳ ኢሰታሰ ዮቲደሰ።

66 ዲኤቲላፌ ሲሚዳ ኣሳ ኩሚላ ቆዳይ ኢሲ ቦላ 42,360

67 ቃሴካ ኢሰታ ኦሳንቻታ፣ ማጫሳቲኔ ኣቱማሳታ ቆዳይ 7,337 ቃሴ ማዛሙሪ ዩጺዛ ማጫሳቲኔ ኣቱማሳታ ቆዳይ ኢሲ ቦላ 245

68 ፓራቲ 736፣ ባቁሎቲ 245

69 ጋሚላቲ 435፣ ሃሬቲ 6,720።

70 ኢሲ ኢሲ ኩላ አዋቲ ጸሳ ኩላ ኦሶሰ አሞታ ሺሺዳ፤ ኢሰታ ጊዶፌ ዳሬዛ ኣይሲዛይሲ ጌዳራን 8 ኪሎኔ ባጋ ጊዲዛ ዋርቃ፣ 50 ጉቃ ሳኔ፣ 530 ቄሴታ ማይኦ አሚደሰ።

71 ኩላ አዋቲካ ጌዳራን 168 ኪሎ ጊዲዛ ዋርቃኔ 1,250 ኪሎ ጊዲዛ ቢራ አሚዳ።

72 ኣቲዳ ኣሳቲ 168 ኪሎ ጊዲዛ ዋርቃ 1,100 ኪሎ ጊዲዛ ቢራኔ 67 ቄሴታ ማይኦታካ አሚዳ።

73 ቄሴቲ፣ ሌዌቲ፣ ጸሳ ኩላ ጊሴ ናጊዛ ዛቤቲ፣ ዩላ ዩጺዛይቲ ዳራፔ ዳሪዛ ባጋይኔ ጸሳ ኩላን ኦሊዛይቲ ኡባይ ኢሲ ቦላ ኢሰራኤሌ ዳሬ ኣሳይ ባ ካታማን ካታማን ጌሊ ዳኢደሰ።

8

ጸሳ ዋጋ ማጽፋ ናባቤቲል

1 ኢሰራኤሌ ዳሬይ ላፑንላ ኣጊናን ባ ዲዛ ካታማን ካታማን ኡቲደሰ፤ ሄ ኣጊናን ኮይሮ ጋላሰ ዩሩሳላሚን ሃላ ፔንጌ ጌቲቲዛሶን ጋላ ባጋራ ኣሳይ ኢሲ ዋዚናን ጊዲዳ ኢሲ ቦላ ሸቂደሰ፤ ኢሰቲካ ጸሳ ዋጋ ማጽፋ ኤራንቻ ጊዲዳ ኣሰታማሪ ኢዝራይ ጸሳይ ኢሰራኤሌሰ ኣዛዚዳ ዋጋ ማጽፋ ኢሰታሰ ኤሃና ማላ ኦይቺዳ።

* 7:65 ኡሪሚኒኔ ቱሚሚይ ቄሴታ ማይኦሰ ሲንላ ባጋራ ቲሪ ኪሴን ኡቲዳ ኢሰቲ ጸሳ ሸኪ ሻኪ ኤራና ማላ ማዲዛ ሚሻታ። 7:65 ኩላ 28:30፤ ዛሬ 33:8

7:73 1ታሪ 9:2፤ ናሂ 11:3

2 ሄሳ ጊሻስ ኢዘራይ ላፑንፋ ኣገናይ ጌሊዳ ኮይሮ ጋላስ ሎኤሊ ኣኬካናዉ ዳንዳይዛ ኣሲ ኡባይ፥ ማጫይ፥ ኣቱማይ ወሪ ሸቂዳሶ ዋጋ ማጽፋ ኤኪ ዪዴስ።

3 ሄ ዴምባን ኢዘራይ ገምቤ ፔንጌ ጌቲቲዛይሳ ማታን ኤቂዲ ዋንታ ማላዶፔ ሴታ ጋላስ ጋካናስ ዋጋ ማጽፋ ኣኬካናስ ዳንዳይዛ ኣሳ ኡባ ሲንፋን ባ ቃላ ቶቁ ሂስቲ ናባቢዴስ፤ ዴሬይ ወሪ ሎኤሊ ሲዪዴስ።

4 ሄ ኦሶዛስ ኢንጃ ጌዳና ማላ ኢዘራይ ሚላፌ ኦሴቲዳ ቆቃሶሆን ኤቂዴስ፤ ኢዛስ ኡሻቻ ባጋራ ኤቂዳ ኣሳቲ ማቲቲያ፥ ሸማኤ፥ ኣናያ፥ ኡሪያ፥ ሂልቂያኔ ማኢሳያ ጌዲሺን ሃዲርሳ ባጋራ ኤቂዳይቲ ፓዳያ፥ ሚሻኤሌ፥ ማልኪያ፥ ሃሹሜ፥ ሃሺባዳኔ፥ ዛካራሳኔ ማሹላሜ።

5 ኢዘራይ ቶቁ ጌዲ ኦሴቲዳ ማዲራኬዛ ቦላ ኬዚ ኤቂዳ ዋዴ ኣሳይ ወሪ ኢዛ ቲሺ ሂስቲ ጴሊዴስ፤ ኢዚ ዋጋ ማጽፋ ደይዳ ማላ ኡባ ኣሳይ ባ ኡቲዳሶሆፔ ዴንዲ ኤቂዴስ።

6 ኢዘራይ ጌታ ጸሳ ጋላቲዴስ፤ ኣሳይ ወሪ ባ ኩሼ ፑዴ ዴንሲዲ «ኣሚን! ኣሚን!» ጌ ዛሪዴስ፤ ቢታ ቦላ ወሪ ጉፋኒዲ ጸሳስ ጎይኒዴስ።

7 ሄሳፌ ጉዬ ኣሳይ ባ ዲዛሶን ዲዛሶን ዴንዲ ኤቂዴስ፤ ሃይሳፌ ካሊ ሱንፋይ ጸፊቲዳ ሌዌ ባጋቲ ዋጋ ማጽፋ ዴራስ ናባቢዳ፤ ኢስቲካ ኢያሶ፥ ባኔ፥ ሸሬቢያ፥ ያሚኔ፥ ኣቁቤ፥ ሳባታ፥ ሆዲያ፥ ማኢሳያ፥ ቃሊጸ፥ ኣዛሪያሳ፥ ዮዛባዴ፥ ሃናኔኔ ፓላዬ።

8 ኢስቲካ ኣሳስ ናባቤቲዳ ጸሳ ዋጋ ማጽፋይ ሎኤ ጌላና ማላ ሎኤሊ ቢርሺ ዮቲዳ።

9 ጸሳ ዋጋ ኣሳይ ሲዪዳ ማላ ዬኪዳ ጊሻስ ዴሬ ኣይሲዛ ናሂሚያይ፥ ቄሴኔ ዋጋ ሎኤሊ ኤሪዛ ኢዘራይ፥ ዴራ ታማርሲዛ ሌዌ ባጋቲ «ሃና ጋላሳያ ኢንቲ ጸሳስ ዴማቲዳ ጋላስ ጌዲዳ ጊሻስ ጩጮፕቲኔ ዬኮፍቲ» ጌዴ።

10 ናሂሚያይ፥ «ቢዲ ሎኦ ካል ሚቲ፤ ቃሴ ማልኢዛ ኡሹ ኡዪ ኡፋዬቲቲ፤ ኣይኮይ ባይንዳይታስ ኢንቲስ ዲዛይሳፌ ኣሚቲ፤ ሃይሲ ኦ ጸሳስ ኣንጃቲዳ ጋላሳ፤ ጸሳ ኡፋይሳይ ኢንቲስ ዋልቃ ጌዲዳ ጊሻስ ጩጮፕቲ» ጌዴስ።

11 ሌዌ ባጋቲ፥ «ሃ ኣንጃቲዳ ጋላስ ኢንቲ ጩጫና ቤሴና» ጌዲ ዴራ ሃይዚሲዳ።

12 ኣሳይ ባ ሲዪዳ ቃላ ሎኤሊ ኤሪዳ ጊሻስ ባሶ ቢዲ ካል ሚዲኔ ሃል ኡዪ ኡፋዬቲዲ ባስ ዲዛ ካላፌ ሃራታስ ሻኪ ኢሚዴስ።

ዳሴ ባኣሌ ቦንቹቲል

13 ላፑንሶ ኣገናን ናምኣንሶ ጋላስ ኮራፒኔቲ ቄሴታራኔ ለዌ ባጋታራ ኢሲፌ ገዲዲ ጸሓ ዋጋ ታማራናስ ጸፌ ኢዘራኮ ቢዳ።

14 ኢስራኤሌ ኣሳይ ላፑንሶ ኣገናን ቦንቹቲዛ ዳሴ ባኣሌዛን ዳሴ ገደን ኡታና ማላ ጸሲ ሙሴ ባጋራ ኢሚዳ ኣዛዘዚ ዋጋ ማጸፋን ጸፊቲ ዲዛይሳ ዴሚዳ።

15 ሄሳ ገሻስ ኣሳይ ባ ዲዛ ካታማን ካታማኒኔ ዬሩሳላሚን ቢዳ፡ «ፑዴ ዙማታ ቦላ ኬዘቲ፤ ዛይቲይ ኬዘዛ ዋጋራ ሚሊኔ ዋራ ዋጋራ ሚላ ሃጋ፤ ባርሲኔቲ ጌቲቲዛ ሚል፤ ዛምባ ሃጋታ ኤሂዲ ዳሴ ዬጌቲ» ገ ኣዋጅና ማላኔ ዮታና ማላ ካሴ ዋጋ ማጸፋን ጸፊቲዳ ማላ ኣዛዘዲ።

16 ሄሳ ገሻስ ኣሳይ ሚላ ሃጋታ ቃንጺ ኤኪ ኤሂዲ ባ ኬላ ፖቄ ቦላን፡ ጸሓ ኬላ ፔንጌን ዲዛ ዴምባኒኔ ሃላ ፔንጌ ጌቲቲዛ ዴምባን፡ ሄሳሶዛ ኤፍሬሚ ፔንጌን ዲዛ ዴምባን ዳሴ ዬጌዳ።

17 ዲኤቲላፌ ሲሚዳ ኣሳይ ወሪ ዳሴ ዬጌዲ ኢዛ ገደን ኡቲዴስ፤ ሄሲካ ናዌ ና ኢያሶ ዋዴፔ ሃ ሲሚን ኮይሮ ሃኒዴስ፤ ሄሳ ገሻስ ኣሳይ ወሪ ኢሶይ ኢሶይ ኬሂ ኡፋዬቲዴስ።

18 ባኣሌዚ ዶሚቲዳ ጋላሳፌ ቢ ወራና ጋላስ ጋካናስ ኢዘራይ ጸሓ ዋጋ ማጸፋፔ ኡባ ዋዴ ጋላስ ጋላስ ኢሲ ኢሲ ኪፊሌ ኣሳስ ናባቢዴስ፤ ባኣሌዛካ ላፑን ጋላስ ጋካናስ ቦንቹዳ፤ ኦስፑንሶ ጋላስ ዋጋዚ ኣዛዘዚ ማላ ባኣሌዛ ወርሴላን ሞይዞ ባኣሌ ኦሊዳ።

9

ኢስራኤሌ ኣሳይ ባ ናጋራ ፓጼል

1 ሄ ኣገናን ናምኡ ታማኔ ኦይዳንሶ ጋላስ ኢስራኤሌ ኣሳይ ኢሲ ቦላ ሸቂዲ ባ ናጋራ ገሻስ ኬሂ ሞጼቲዳይሳኔ ጩጩዳይሳ ቆንጩሲናስ ማቃ ማይኢዲ ባ ሁኤ ቦላ ጉዲላ ላሊዲ ጸሚዴስ።

2 ኢስራኤሌ ኣሳይ ኣላጋ ኣሳ ኡባፌ ባና ሻኪዴስ፤ ሄሳፌ ጉዬ ኣሳይ ወሪ ዴንዲ ኤቂዲ ኢስቲኔ ካሴ ኢስታ ኣዋቲ ኦሊዳ ናጋራ ኡባ ፓጼዳ።

3 ሄን ኢስቲ ኤቂዳ ማላ ዲሺን ኢስታ ጸሓ ዋጋ ማጸፋይ ሄዙ ሳቲ ኩሚል ኢስታስ ናባቤቲዴስ፤ ቃሴ ሃራ ሄዙ ሳቲ ኩሚል ኢስቲ ባ ናጋራ ፓጼሼ ጎዳስ ባ ጸሓስ ሆኪ ጎይኒዳ።

4 ለዌ ባጋታሰካ ኤቂዛ ማዲራኬይ ዳስ፤ ሄ ማዲራኬዛ ቦላ ኢያሶይ፡ ባኔይ፡ ቃዲምኤሌይ፡ ሼባኒያይ፡ ቡኔይ፡ ሼሬቢያይ፡ ባኔይኔ ካናኔይ ኤቂዲ ባ ቃላ ቶቄ ሂሰቲዲ ጎዳ ባንታ ጸሳኮ ዋሲዳ።

5 ኢያሶ፡ ቃዲምኤሌ፡ ባኔ፡ ሃሻቢናዬ፡ ሼሬቢያ፡ ሆዲያ፡ ሼባኒያኔ ፓታያ ጌቲቲዛ ለዌ ባጋ ኣሳቲ፡
«ኢንቲ ዳንዲ ኤቂዲ ሜርና ጎዳ
ኢንቲ ጸሳ ጋላቲቲ፤
ጋላታፔኔ ኣንጃፌ
ቶቄ ቶቄ ጊዳ
ቦንቹቲዳ ጸሳ ሱንላ
ሳቢቲ» ጊዳ።

ማሬታና ዋሲዳ ዋሳ

6 ሄሳፌ ጉዬ ኢስራኤሌ ኣሳይ፡
«ጸሶ፡ ኔ ጸላ ጎዳ፤
ሳሎኔ ሳሎ ቦላ ዲዛይታ፡
ሳኣኔ ሳኣ ቦላ ዲዛይታ፡
ጌታ ኣባኔ ኢዛ ጊዶን ዲዛይታ
ኡባ ሜዲዳይ ኔና።
ኡባሰ ዴኦ ሼምፖ ኢማዳሳ፤
ሳሎ ሜዶቲላቲ ኡባይ
ኔሰ ጎይኔቴሰ።

7 ጎዳዉ፡ ኔኒ ጸሳ!
ኔኒ ኣብራሚ ኡሬ ጌቲቲዛ
ካላዳዌ ዴሬፔ ዶራዳ
ጴይጋ ኬሳዳሳ፤
ኢዛ ሱንላካ
ኣብራሃሚ ጋዳሳ።

8 ኢዚ ኔሰ ኣማኔቲዳ ኣሰ
ጊዲዳይሳ ቤያዳ
ኢዛራ ጫቂታዳሳ፤
ካናኔ ኣሳይ፡ ሂቲ ኣሳይ፡
ኣሞሬ ኣሳይ፡
ፓሪዜ ኣሳይ፡ ያቡሴ ኣሳይኔ
ጌርጌሴ ኣሳይ
ኢዛን ዲዛ ቢታ፡
ኢዛ ዜሬላታሰ

ዱሳ ቢታ ጊዳና ማላ
 ላቲሳናሰ ጫቆ
 ቃላ ጌላዳሳ፤
 ኔኒ ዲሎ ጊዲዳ ጊሻሰ
 ኔ ጫቆ ቃላ ሚንፋ ናጋዳሳ።

9 «ኔኒ ኑ አዋታ ቦላ
 ካሴ ጊብጼ ቢታን ጋኪዳ
 ዋዬዛ ቤያዳሳ፤
 ኢሰቲ ዘኦ አባ ማታን ዲሼ
 ማዶ ኮዪዲ
 ኔና ዋሲዳ ዋሳ ሲያዳሳ።

10 ጊብጼ ካዋ ቦላ፥
 ሹሜታ ቦላኔ
 ሄ ቢታን ዲዛ አሳ
 ኩሜላ ቦላ
 ጌታ ማላታታ ቆንጨሳ ቤሳዳሳ።
 ሄሳ ኔ ኦሊዳይ ካሴ ኑ አዋታ
 ጊብጼ አሳይ አይ ማላ ኢሰታሰ
 ሚንጼ ኢቲዲ ዋዪሲዳኮ
 ኔ ቤኢዳ ጊሻሳ፤
 ኔ ሄሳ ኦሶይሳ ጋሶን
 ሃች ጋካናሰ
 ኔ ሱንላይ ቦንቾን
 ጾይጌታና ማላ ኦላዳሳ።

11 ኢሰታ ሲንፋን አባ
 ናምኡ ኬሳ ሻካዳ፥
 ሜላ ቢታራካ
 ኢሰታ ፒንፋዳሳ፤
 ሹች ዱጌ ጨማ ሃላ
 ጊዶን ዩጊዛ ማላ
 ኢሰታ ጎዲዛይታ ጨማ
 ሃላ ጊዶ ዩጋዳሳ።

12 ጋላሰ ቱሳ ማላ ኤቂዳ ሻራን፥
 ኦማርሲ ቱሳ ማላ
 ታማን ፖኢሳዳ

ኢስቲ ባናስ ቤሲዛ ኑጌራ
ባና ማላ ካሌላዳሳ።

13 «ሳሎፔ ዳጌ
ሲና ዙማ ቦላ ዋቋዳ
ኔ ዴሬዛ ሃሳይሳዳሳ፤
ሎኑ ዋጋታኔ ሱሬ ቲሚርቲታ
ኔ ኢስታስ ኢማዳሳ።

14 ጌሻ ኔ ሳምባታ
ኢስቲ ቦንቻና ማላ
ታማርሳዳሳ፤
ኔ አዛዘታ፥ ዋጋታኔ ማራታ
ኔ ኦሳንቻ ሙሴ ባጋራ
ኢስታስ ኢማዳሳ።

15 ኢስቲ ጋፌቲዳ ዋዴ
ሳሎፔ ካል ኢማዳሳ፤
ኢስቲ ሳሜቲዳ ዋዴ ሃል
ዛላፌ ኢስታስ ፑልቲሳዳሳ፤
ቃሴ ኔ ኢስታስ ኢማና ጋዳ
ጫቂዳ ቢታ ጌሊዲ
ኤካና ማላ አዛዛዳሳ።

16 «ካሴ ኑ አዋቲ ኦቶራንቻኔ
ዋዚና ሙሜ ጌዲዳ ጌሻስ
ኔ አዛዘ ናጊቤቴና፤

17 ኔስ አዛዘቲቤቴና፤
ኔ ኢስታስ ኦሊዳ ጌታ
ማላታካ ኡባ ዶጊዳ፤
ዋዚና ሙሜ ጌዲዳ፤
ቃሴ ጉዬ ጊብጾ አይሌቴላን
ዛራና ማላ
ባንታና ካሌሊዛ
አስ ዶሪዳ።

ጌዶ አቲን ኔኒ ሲቆን
ኩሚዳ ጸሳ፤
ሃንቆስ ታኪዛ ጸሳ፤

- አቶ ጊዛ ጸሳ፥
ከያኔ ማሪዛ
ጎዳ ጊዲዳ ጊሻሰ
ኔ ኢስታ አጋቤካ።
- 18 ማራ ለሚሶን ባሰ ኤቃ ጸሰ ኦሊዲ፥
ረብዶ ቢታፌ
ኑና ካሌሊዲ ከሲዳ
ጸሲ ሃይሳኮ!፤ ጊዳ።
ኔ ሱንሳካ አይ ማላ
ሞሮ ሞሪዶ!
- 19 «ኔ ማሮታይ ጊታ ጊዲዳ ጊሻሰ
ኢስቲ ሄን ባዞ ቢታን ቆዩ
አታና ማላ አጋቤካ፤
ጊዶ አቲን ኢስቲ ጋላሰ
ቱሳ ማላ ሻራን
ኦማርሰ ቱሳ ማላ ታማን
ኢስቲ ባናሰ ቤሲዛ ኦጌራ
ኢስታ ካሌላ አጋቤካ።
- 20 ሎኦ ጊዲዳ ኔ አያና
ኢስታ ታማርሳና ማላ ኢማዳሳ፤
ኢስታሰ ማና ማላ ማና፥
ኡያና ማላ ሃል ኢማዳሳ።
- 21 ኦይዱ ታሙ ላይል ኩሜል
ኢስታ ባዞ ቢታን ማዳዳ
ኢስታሰ ኮሺዛ ሚሼ
ኢሲኖካ ዲጋቤካ፤
ኢስቲ ማይኢዳ ማይኦይ
ወሪቤና፤
ቃሴ ኢስታ ቶሆይካ
ፑሪቤና።
- 22 «ኢስታ ዴራ ዩዩ
አጁ ዲዛ ዴሬታኔ
ኢስቲ ካዎቴላታ ኡባ
ጸኒዲ ሄ ቢታ
ኤካና ማላ ኦላዳሳ፤

ሄሳ ገሻሰ
 ካዎ ሲሆኔይ ኣይሲዛ
 ሃሴቦኔ ጌቲቲዛ ቢታኔ
 ካዎ ኣጌይ ኣይሲዛ
 ባሳኔ ጌቲቲዛ ቢታ
 ጸኒዲ ላቲዲ።

23 ኢስታስ ቆዳይ ሳሎ ጸሊንቲ ማላ
 ዳሪዳ ናይታ ኢማዳሳ፤
 ካሴ ኢስታ ኣዋታስ ኔ ኢማና ጋ
 ቃላ ጌሊዳ ቢታ
 ኢስቲ ጸኒ ላታና ማላ
 ኦላዳሳ።

24 ኢስታ ናይቲ ካናኔ ቢታ
 ጸኒ ላቲዲ፤
 ሄ ቢታን ዲዛ ኣሳታ
 ኔኒ ጸናዳሳ፤
 ኢስታ ካዎታ ቦላኔ ካናኔ
 ቢታን ዲዛ ኣሳታ ቦላ
 ባ ደሲዳ ማላ ኦላና ማላ
 ዋልቃ ኢማዳሳ።

25 ቃሴ ሎኢ ገምቤቲዳ
 ካታማታኔ ኣራዳ ቢታ፥
 ሎኦ ሚሽ
 ኢስታን ኩሚዳ ኬላታ፥
 ሃላ ኦላታኔ
 ዋይኔ ኣታኪልቲይ ቶኬቲዛ ጋዴ፥
 ዋጋራ ሚላታኔ ዳሮ ኣይፌ
 ኣይፊዛ ሚላታ ላቲዲ፤
 ሚዲኔ ኡዪዲ ሞፏዲ፤
 ኔኒ ኔ ኪያቲላን ኢሚዳ ሎኦ ሚሻን ዉሪ ኡፋዬቲዳ።

26 «ጊዶ ኣቲን ኢስቲ ኔ ቦላ ማካሊዳ፤
 ኀኔ ቃላሰካ ኣዛዜቶኮ ጊዳ፤
 ኔ ዋጋ ሲዮኮ ጊዲ
 ኔሰ ዞኮ ዛሪዳ፤
 ቃሴ ኢስቲ ኔኮ ዛራና ጊዲ

- ሴሪ ታማርሲዳ ናቤታ ዋጂዳ፤
 ኡባ ዋዴ ኔ ቦላ
 ጫሻ ቃላ ሃሳይዳ።
- 27 ሄሳ ጊሻስ ኢስታ ሞርኬቲ
 ኢስታ ጸኒዲ ሃራና ማላ
 አላ ኢማዳሳ፤
 ሞርኬቲካ ኢስታ ሜቶሊዳ፤
 ኢስቲ ባንታና ሜቲዳ ዋዴ
 ኔኮ ዋሲዳ፤
 ኔካ ኢስታ ዋሳ
 ሳሎን ዳዳ ሲያዳሳ፤
 ኔ ማሮቲላ ጊታቲላፌ ዴንዲዳይሳን
 ኢስታ ሞርኬታፔ አሻና
 ካሌሊዛይታ ዬዳዳሳ።
- 28 «ጊዶ አቲን ሳሮ ዴሚዳ ዋዴ
 ቃሴካ ሲሚ ናጋራ ኦሊዳ፤
 ሄሳ ጊሻስ ኔ ኢስታ ሞርኬታስ
 አላ ኢማዳሳ፤
 ኢስታ ሞርኬቲካ ኢስታ ሃሪዳ፤
 ጊዶ አቲን ኔ ማዳና ማላ ጊዲ
 ኔኮ ሲሚ ዋሲዳ ዋዴ
 ሳሎን ዳሼ ኢስታ ዋሳ ሲያዳሳ፤
 ኔኒ ኔ ቃጄቲላፌ
 ዴንዲዳይሳን
 ኢስታ ኡባ ዋዴ ማዳዳሳ።
- 29 ኔ ቃላኮ ሲማና ማላ
 ኔኒ ኢስታ ሴራዳሳ፤
 ጊዶ አቲን ባ ኦቶሮቲላፌ
 ዴንዲዳይሳን
 ኔ አዛዘታ ካጂዳ፤
 ኢስቲ አዛዘቲዳኮ
 ኢስታስ ዴኦ ኢሚዛ
 ኔ ዋጋታ ቦላ ናጋራ ኦሊዳ።
 ኢስታ ዋዚናይ ሙሚዳ ጊሻስ
 ባ ሲንሐ ሃራሶ ዛሪዳ፤
 ቃሴ ባ ዋዚና ሙሚሲዲ

- ኔ አዛዙታ ኢጲዳ።
 30 ዳር ላይህ ኔ ኢስታ ዳንዳያዳሳ፤
 ኢስታ ታማርሳና ማላ ናቤታ
 ኔ አያናን ኢስታስ ዴንፋዳሳ፤
 ጊዶ አቲን ኢስቲ ሎኤሊ
 ሰዪቤቴና፤
 ሄሳ ጊሻስ ኢስታ ዴሬ
 ማታን ዲዛ አሳቲ
 ጸናና ማላ
 ኢስታ አላ ኢማዳሳ።
 31 ጊዶ አቲን ኔ ማሮቴላ
 ጊታቴላፌ ዴንዲዳይሳን
 ኢስታ አጋቤካ፤
 ኔ ኪያኔ አቶ ጊዛ
 ጸሳ ጊዲዳ ጊሻስ
 ኢስታ ጳይሳቤካ።
 32 ጊታ፥ ዋልቃማኔ ያሺዛ
 ኑ ጸሳዉ!
 ኔኒ ኔ ጫቆ ቃላኔ ሚርና ጋካናዉ ዲዛ
 ኔ ሲቆ ናጋሳ፤
 ኑ ቦላ፥ ኑ ካዋታ ቦላኔ
 ኑና ካሌሊዛይታ ቦላ
 ኑ ቄሴታ ቦላኔ ኑ ናቤታ ቦላ
 ኑ አዋታ ቦላ፥
 ቃሴካ ዴሬ ኡባ ቦላ፥
 አሶሬ ካዋታፔ ዶሚዲ
 ሃቶ ጋካናስ ጋኪዳ ሜቶ
 ኡባ ኔ ቆፓ።
 33 ኔ ኑና ቃጸያና ጋዳ
 ኔ ኦሊዳይሲ ዉሪ ሊኬ፤
 ኑኒ ናጋራ ኦሊኮካ
 ኔኒ ኔ አማኔቴላን
 ሚና ኤቃዳሳ።
 34 ካሴ ኑ አዋቲኔ
 ኑ ካዋቲ፥
 ኑና ካሌሊዛይቲኔ ኑ ቄሴቲ

ኔ ዋጋ ናጊቤቴና፤
ቃሴ ኔ ኢስታስ አሚዳ
እዛዘታኔ
ሴራ ዘሬ ሲዪቤቴና።

35 ኔ ኢስታ ካዎቴላን
ኢስታስ ጊታ እንጂ አማዳሳ፤
አራዳኔ አሆ ቢታ
ኢስታስ አማዳሳ፤
ጊዶ አቲን ኢስቲ
ባ ናጋራፔ ሲሚዳ
ኔስ ጎይኒቤቴና።

36 ሄሳፌ ዴንዲዳይሳን
ኔ ኑ አዋቲ
አይፌዮ ማና ማላኔ
ሎኑ ሚሻን ኡፋዬታና ማላ
ኔ ኢስታስ አሚዳ ቢታን
ሃቶ ኑ አይሌ ጊዲዶስ።

37 ኑኒ ናጋራ ኦሊዳ ጋሶን
ኔኒ ኑ ቦላ ካዎሊዳ ካዎቲ
ኑ ቢታ እንጂ ኡባ
ኢስቲ ጎኤቴቴስ፤
ቃሴ ኑ ቦላኔ ኑ ሜሄታ ቦላ
ባ ኮዪዳ ማላ ኦሌቴስ፤
ሄሳፌ ዴንዲዳይሳን
ኑኒ ሃኢ ጊታ ዋዬ ቦላ ዶስ።

አሳይ ቃቺዳ ቃላ ፒርማን ቆንጪሴል

38 «ሃኒዳ ዮኑ ኡባስ ኑኒ ኢስራኤሌ አሳይ ቃላን ጋጊዳይሳ
ጸፊ ዋላናስ ቃላ ቃቺዶስ፤ ኑ ቃቺን ጸፊቲዳ ቃላ ቦላ ኑና
ካሌሊዛይቲ፤ ሌዌ ባጋቲኔ ኑ ቄሴቲ ባ ማታሜ ሾጪዳ» ጊዳ።

10

1 ማታሜ ሾጪዳይቲ ሃካሊያ ና ዴሬ አይሲዛ ናሂሚያ፤
ሴዴቂያሳ፤

2 ቄሴታ ባጋፌ ሳራያ፤ አዛሪያሳ፤ ኤርማሳ

3 ፓሽኩሬ፤ አማሪያ፤ ማልኪያ፤

4 ሃጹሼ፤ ሼባኒያ፤ ማሉኬ፤

5 ሃሪሜ፤ ሜርሞቴ፤ አብዲዩ፤

- 6 ዳኔላ፥ ጊንቶኔ፥ ባሮኬ፥
- 7 ማሹላሜ፥ አቢያ፥ ሚያሚኔ፥
- 8 ማኣዚያ፥ ቢልጋዬኔ ሻማኤ።
- 9 ሌዌ ባጋታፔ አዛኒያ ና ኢያሶ፥ ሄናዳዳ ዛሬፔ ቢኑዌ፥
ቃዲሞኤሌ፥
- 10 ኢሰታ አሻታፔ ሼባኒያ፥ ሆዲያ፥ ቃሊጸ፥ ፓላዬ፥ ሃናኔ፥
- 11 ሚካ፥ ኤራሆቤ፥ ሃሻቢያ፥
- 12 ዛኩሬ፥ ሼሬቢያ፥ ሼባኒያ፥
- 13 ሆዲያ፥ ባኔኔ ቤኒኔ።
- 14 ዳሬ አይሰዛይታ ባጋፌ ፓርሴ፥ ፓሃቴ-ሞኣቤ፥ ኤላሜ፥
ዛቶ፥ ባኒ፥
- 15 ቡኔ፥ አዘጋዴ፥ ቤባዬ፥
- 16 አድኒያሳ፥ ቢጉዋዬ፥ አዲኔ፥
- 17 አጸሬ፥ ሂዝቂያሳ፥ አዙሬ፥
- 18 ሆዲያ፥ ሃሹሜ፥ ቤሳዬ፥
- 19 ሃርፔ፥ አናቶቴ፥ ኔባዬ፥
- 20 ማጊፒአሼ፥ ማሹላሜ፥ ሄዚሬ፥
- 21 ሚሼዛቤሌ፥ ሳዶቄ፥ ያዱኤ፥
- 22 ፓላጸያ፥ ሃናኔ፥ አናያ፥
- 23 ሆሴኤ፥ ሃናኒያ፥ ሃሹቤ፥
- 24 ሃሉሄሼ፥ ፒሊሄ፥ ሾቤቄ፥
- 25 ኤሬሁሜ፥ ሃሻቢኔ፥ ማኢሳያ፥
- 26 አካያ፥ ሃናኔ፥ አናኔ፥
- 27 ማሉኬ፥ ሃሪሜኔ ባኣና።

ኢስራኤል አሳይ ዋሊዳ ጫቆ ቃላ

- 28 «አቲዳ አሳይ፥ ቄሴቲ፥ ሌዌ ባጋቲ፥ ጸሳ ኬላ ጊቤ ናጊዛ
ዛቤቲ፥ ዬላ ዬጸዛይቲኔ ጸሳ ኬላ ኦሳንቻቲ ቃሴካ ጸሳ ዋጋሰ
አዛዜታና» ጊዲ አይዛቤታፔ ባና ሻኪዳ አሳቲ ባ ማቼታራ፥
ባ እቱማ ናይታራኔ ማጫ ናይታራ ኢሲፌ ጊዲዲ ኤሪዛይቲኔ
አኬኪዛይቲ ኡባይ ጫቂዳ፤
- 29 ባና ካሌሊዛይታራ ኢሲፌ ጊዲዲ ጸሳ አይሌ ሙሴ ባጋራ
አሜቲዳ አዛዘታ፥ ፒርዳኔ ዋጋ ናጋና ጊዲ ቃላ ጌሊዳ፤ «ሄሳላ
ኦሶንታ አጊኮ ኑና ሳሞ፤
- 30 ኑ ዳሬ ሄራን ዲዛ አይዛቤታፔ ማቾ ኑ ናይታሰ ኤኮንታ
ማላኔ ኑ ማጫ ናይታ ጌዴ አሞንታ ማላ ጫቆሰ።

31 «እይዛቤቲ ባ ዳሬፔ ሳምባታ ጋላስ ዋይኮ ሃራ ባኣሌታን ካል ዋይኮ ኣይ ሚሺካ ዛልኤስ ኤኪ ዪኮ ኢስታፌ ሻሞኮ። ላፑንሉ ላይላን ላይላን ኑ ጋዴ ሼሞፒሳናስ ጎዮኮ፤ ኑ ታልኤ ኢሚዳ ኣጮዛካ ዛሪ ኤኮኮ።

32 «ላይላን ላይላን ጸሳ ኬላ ኦሶስ ማዲዛ ቢራ ሃቐፌ ኢሲ ኩሼ ኑ ኤሂ ኢማና።

33 ሄሳላካ ጸሳ ኬላ ኦሶስ ቤሲዛ ሚሻታ ኩንሊዲ ሺሻና፤ ሄይቲካ ዱማቲዳ ኡኬል፡ ጋላስ ጋላስ ሺቂዛ ያርሾ ካል፡ ጸጌቲዛ ያርሾስ ጊዲዛ ሚሄታ፡ ሳምባታ ጋላሳታን፡ ኣጊናይ ጋኪሺኒኔ ሃራ ባኣሌ ጋላሳታን ሺቂዛ ሃራ ጌሻ ያርሾ ኡባ፡ ኢስራኤሌ ኣሳ ናጋራ ወርሳናስ ሺቃና ቤሲዛ ሚሺኔ ጸሳ ኬላ ኦሶስ ኮሺዛ ሚሻታ ኡባ ኢማና።

34 «ያርሾ ጊሻስ ሙሴ ዋጋን ጸፊቲዳ ማላ ጎዳ ኑ ጸሳስ ሺቂዛ ያርሾ ጸጋናስ ቤሲዛ ኤሶ ሚል ሺሻና ቤሲዛ ቆሞቲ ኦናንታኮ ኤራናስ ኑኒ ዳሬይ ቄሴቲኔ ሌዌ ባጋቲ ላይላን ላይላን ሳማ ዬጊዲ ዮኦዛ ቃቾስ።

35 «ላይላን ላይላን ኑ ካላታኔ ሚላ ኣይፌታ ማጺ ሺሺዛ ዋዴ ኮይሮ ጋኪዛ ሻቻስ ጸራ ጸሳ ኬል ኤፊ ኢማና።

36 «ኑፔ ኢሶይ ኢሶይ ኮይሮ ዬሌቲዳ ኣቱማ ናይታ ጸሳ ዋጋይ ኣዛዚዛ ማላ ኢስታ ጸሳስ ዱማሳና፤ ጸሳ ኬላን ኦሊዛ ቄሴታስ ኢማና፤ ቃሴ ኑ ሚዛታፔ፡ ኑ ዶርሳታፔ፡ ኑ ዳይሻታፔ ኮይሮ ዬሌቲዛ ማራታኔ ላቃታ ኡባ ጸሳስ ዱማ ሻካና።

37 «ኑኒ ካል ሺሺዛ ዋዴ ኮይሮ ጋኪዛ ካላ ጳሌፌ፡ ዱማ ዱማ ሜቲቲዛ ሚላ ኣይፌፔ፡ ኦራላ ዋይኔ ኡሻፌኔ ዋጋራ ዛይቲ ኡባፌ ጸራ ጸሳ ኬላን ኦሊዛ ቄሴታስ ኤሂ ኢማና፤ ኑ ጎሻ ጋዴይ ዲዛሶን ዲዛሶን ካጺዛ ካላፌ ጊራ ቃንጺሲዛ ሌዌ ባጋታስ ታማፌ ኢሲ ኩሼ ኢማና።

38 ኣስራታይ ሺቂዛ ዋዴ ኣርኔ ዜሬላፌ ጊዲዳ ቄሴይ ሌዌ ባጋታራ ኢሲፌ ኤኬቴስ፤ ሌዌ ባጋቲ ጸሳ ኬላ ኦሶስ ሺሺዳ ኣስራታፔ ታማፌ ኢሲ ኩሼ ጸሳ ኬላ ሚሺ ኡቲዛ ሚንጃ ኬላን ዋሌቴስ።

10:31 ኬሳ 23:10-11፤ ሌዌ 25:1-7፤ ዛሬ 15:1-2 10:32 ኬሳ 30:11-16
 10:35 ኬሳ 23:19፤ 34:26፤ ዛሬ 26:2 10:36 ኬሳ 13:2 10:37 ታይ 18:21 10:38 ታይ 18:26

39 ኢስራኤል አሳይኔ ሌዌ ባጋቲ ካል፡ ዎይኔ ኡሹኔ ዎጋራ ዛይቲ እሞታ ጸሳ ከላ ሚሻቲ ኡቲዛሶኒኔ ቄሴቲ፡ ጸሳ ከላ ጊቤ ናጊዛ ዛቤቲኔ ዬላ ዬጸዛይቲ ሽምፒዛ ሚንጃ ከላን ኤሂ ዎሌቶ።
 «ሄሳ ጊሻሰ፡ ሓ፡ ጸሳ ከላ ኦሶ ኑና አይ ሜቲዴ!» ጊ አጎኮ»
 ጊዲ ጫቂዳ።

11

ዬሩሳላሜን ዲዛ አሳ

1 ዳራ ካሌሊዛይቲ ዬሩሳላሜን ዴኢዳ፤ ቃሴካ ሃንኮ ታሙ ከላ አሳፔ ኢሲ ከላ አሲ ጌሽ ጊዲዳ ዬሩሳላሜ ካታማን ዳናይታሰ ሳማ ዬጊ ዶሪዳ፤ ሃንኮ አቲዳ አሳይ ጊዲኮ ዲማ ዲማ ካታማታ ባሰ ዴላሶ ኦሊዴሰ፤

2 አሳይካ፡ «ዬሩሳላሜን ዳና» ጊዲ ባ ሼኔን ዴንዴቲዳ አሳ ኡባ አንጂዴሰ።

3 ሃራ ጉታታኒኔ ካታማታን ዴኢዛ ኢስራኤል አሳይ፡ ቄሴቲ፡ ሌዌ ባጋቲ፡ ጸሳ ከላ ኦሳንቻቲኔ ሶሎሞኔ አይሌታ ዜሬላቲ ባ ሃሮይ ዲዛሶን ዲዛሶን ዴኢዳ፤ ሃይሳፌ ካሊ ጳፊቲዳይቲ ዬሩሳላሜን ዴኢዛ ዩሁዳ ዴሬ ካሌሊዛ አሳታ።

4 ዩሁዳ ዛርኬፌ ዩዳ ካሌሊዛይቲ ፓሬሴ ዜሬላፌ ጊዲዳይቲ ማላልኤሌ ና፡ ሻፋጺያ ና፡ አማሪያ ና፡ ዛካራሳ ና፡ ኦዚያ ና፡ አታዩያ፡

5 ሴሎ ዜሬላፌ ዛካራሳ ና፡ ዮያሪቤ ና፡ አዳያ ና፡ ኦዚያ ና፡ ኮሊ-ሆኬ ና፡ ባሮኬ ና፡ ማኢሳያ።

6 ዬሩሳላሜን ኡቲዳ ፓሬሴ ዜሬላታፔ ኤሬቲዳ ዎልቃማ አሳቲ 468።

7 ቢኒያሜ ዜሬላታፔ፡ ዩሻኢያ ና፡ ኢቲኤሌ ና፡ ማኢሳያ ና፡ ቆላያ ና፡ ፓዳያ ና፡ ዮኤዴ ና፡ ማሹላሜ ና፡ ሳሉዬ፡

8 ሳሉሰ ማታ ዳቦቲ፡ ጋባያኔ ሳላዬ፡ ዬሩሳላሜን ዴኢዛ ቢኒያሜ ዜሬላቲ ኢሲ ቦላ 928።

9 ዚኪሬ ና ኢዩኤሌይ ኢሰታ ካሌሊዛይሳ ጊዲሺን ሃሳኡኤ ና ዩሁዳይ ኢዛፔ ጋርሳራ ካታማ አይሲዛ ናምኣንሐ ዳና።

10 ቄሴታ ባጋፌ፡ ዮያሪቤ ና፡ ያዳያ ና፡ ያኪኔ ና፡

11 ጸሳ ከላ ሃላቃ ጊዲዳ አሂጹቤ ና፡ ማራዮታ ና፡ ሳዶቄ ና፡ ማሹላሜ ና፡ ኪልቂያሳ ና ሳራያ፡

12 ኢስታራ ኢሲፌ ጸሳ ኩላ ኦሶ ኦሊዳ አሳይ ኢሲ ቦላ 822፤ ማልኪያ ና፥ ፓሽኩሬ ና፥ ዛካራሳ ና፥ አሞዛኔ ና፥ ፓላሊያ ና፥ ዪሮሃሚ ና አዳያ፥

13 ሃ ዜሬላታ ጊዶፌ 242 ኮራፒኔታ። ኢሚሬ ና፥ ማሺሌሚቲ ና፥ አሂዛያ ና፥ አዛሪኤሌ ና፥ አማሺሳ፥

14 ሃ ዜሬላታ ጊዶፌ ኤሬቲዳ ዋታዳራቲ 128፤ ኢስታ ካሌሊዛይ ሃጊዶሌሚ ና ዛብዲኤሌ።

15 ሌዌ ባጋፌ፥ ቡኔ ና፥ ሃሻቢያ ና፥ አዚርቃሚ ና፥ ሃሹቤ ና ሻማኤ፥

16 ሳባታይኔ ዮዛባዴ ጌቲቲዛ ኤዌ ባጋታ ካሌሊዛይቲ ጸሳ ኩላስ ካሬ ባጋራ ኦሴቲዛ ኡባ ኦሶስ አላፌታ።

17 ዛብዴ ና፥ ሚካ ና ማታኒያ፥ ዬላ ዬጺዛይታ ሃላቃ ጊዲዳ አሳፌ ና፥ ባ አሻታፔ ናምኦንሐዛ ባቂቡቂያ፥ ሻሙኤ ና ጊዲዳ አቢዳ ና፥ ጋላሌ ና፥ ኤዶታኔ ና።

18 ሌዌ ዜሬላታፔ 284 አሳቲ ጌሻ ካታማ ዬሩሳላሚን ዴኢዳ።

19 ጸሳ ኩላ ጊቤ ናጊዛ ዛቤቲ፥ አቁቤ፥ ጸልሞኔኔ ኢስታራ ኢሲፌ ኦሊዛ ዛቤቲ 172።

20 ሃንኮ ኢሰራኤሌ አሳይ፥ ቄሴቲኔ ሌዌ ባጋቲ ዉሪ ባ ጋዴን ጋዴን ዩሁዳ ካታማ ጊዶን ዴኢዳ።

21 ጸሳ ኩላ ኦሳንቻቲ ዬሩሳላሚስ ኢሲ ባጋራ ዲዛ ኦፌሌ ጌቲቲዛ ቶቃሶሆን ዴቲስ፤ ጸሃይኔ ጊሻፋ ጌቲቲዛይቲ ኢስታስ ሃላቃታ።

22 ዬሩሳላሚን ሌዌታ ባጋ ሃላቃ ሚካ ና፥ ማታኒያ ና፥ ሃሻቢያ ና፥ ባኔ ና፥ ኡዜይ ጸሳ ኩላን ዬላ ዬጺዛይታ ሃላቃ ጊዲዳ አሳፌ ዜሬላ።

23 ኢስቲ ጋላስ ጋላስ ጸሳ ኩላን ዬጾቲዛ ዬላ ማራን ማራን ታራ ኦይኪ ዬጸና ማላ ካዎፔ ኢዛስ ኢሜቲዳ አዛዘይ ዴስ።

24 ዩሁዳ ዛርኬን ዛራሄ ዛሬፔ ሜሽዛቤሌ ና ፓታያይ ፓሪሴ ካዎቴላ ጊዶን ዲዛ ኢሰራኤሌ ዴራ ኮሺዛ ዮኦታስ ካዎ ኢንዲራሴ።

ሃራ ቄሪ ካታማታን ዲዛ አሳ

25 ዩሁዳ አሳፔ ኢሶቲ ኢሶቲ ባ ጋዴ ማታን ዲዛ ካታማታ ቂሪያቲ-አርባኤኒኔ ኢዛ ማታን ዲዛ ጉታታን፥ ዲቦኒኔ ኢዛ ሄራን ዲዛ ጉታታን ቃሴ ዪቂቢጾኤሌኒኔ ኢዛ ሄራን ዲዛ ጉታታን ኡቲዳ።

26 ሃራይ ቃሴ ኢያሶ፥ ሞላዴ፥ ቤቲ-ጳሌጾ፥

- 27 ሃጸሬ-ሹኣሌ ጌቲቲዛ ካታማታን ዴቲስ፤ ቤርሳቤሄኒኔ ኢዚ ሄራን ዲዛ ቁሪ ካታማቲካ ኢስታስ ዲሳሶ፤
- 28 ጸሊላጌ ካታማን ሃራፔካ ሜኮናኒኔ ኢዚ ሄራን ዲዛ ጉታታን፤
- 29 ኤን-ሪሞናን፤ ጸራኣን፤ ያርሙቲን፤
- 30 ዛኖሄን፤ አዲላሜኒኔ ሄ ካታማታ ማታን ዲዛ ጉታታ ኡባሶን ዴቲስ፤ ቃሴ ላኪሼኒኔ ኢዚ ማታን ዲዛ ጋዴታን፤ አዜቄኒኔ ኢዚ ማታን ዲዛ ጉታቲ ዉሪ ኢስታስ ዲሳሶ፤ ሄሳፉካ ዩሁዳ ዴሬ አሳይ ዲጌ ባጋራ ቤርሳቤሄፔ ቢዲ ፑዴ ባጋ ሄኖሜ ሾባፌ ሃ ሲሚን ዲዛሶን ኡቲዳ፡፡
- 31 ቃሴካ ቢኒያሜ ዜሬፋቲ፤ ጌባን፤ ማኪማሴን፤ አዬን፤ ቤቱሌኒኔ ኢዚ ሄራን ዲዛ ጉታታን ዴቲስ፤
- 32 ቃሴ አናቶቲን፤ ኖቤን፤ አናኒያን፤
- 33 ሃጸሬን፤ ኤራማን፤ ጌቲሜ፤
- 34 ሃዲዴን፤ ጸቦኢሜን፤ ናባላዴን፤
- 35 ሎዳኒኔ፤ ኦኖን ሄሳፉካ «ኩሼ ሂላንቻታ ሾባ» ጌቲቲዛሶ ኡባይ ኢስታስ ዲሳሶ፡፡
- 36 ዩሁዳ ዴሬ ጋርሳን ዲዛ ሌዌ ባጋታፔ ባጋይቲ ቢኒያሜ ዴሬራ ኢሲፌ ኡቲዳ፡፡

12

ዲኤቲፋፌ ሲሚዳ ሌዌታ ሱንሊኔ ቄሴታ ሱንሊ

- 1 ሳላቲያሌ ና ዜሩባቤሌኔ ቄሴታ ሃላቃ ኢያሶራ ዲኤቲፋፌ ሲሚዳ ቄሴታ ሱንሊኔ ሌዌታ ሱንሊ ሃይሳፌ ካሊዛይሳ፤ ቄሴቲ፤ ሳራያ፤ ኤርማሳ፤ ኢዝራ፤
- 2 አማሪያ፤ ማሉኬ፤ ሃጸሹ፤
- 3 ሻካኒያ፤ ኤሬሁሜ፤ ሜርሞቲ፤
- 4 ኢዶ፤ ገንቶዬ፤ አቢያ፤
- 5 ሚያሚኔ፤ ማኣዲያ፤ ቢልጋ፤
- 6 ሻማኤ፤ ዮያሪቤ፤ ያዳያ፤
- 7 ሳሉ፤ አሞኬ፤ ኪልቂያሳ፤ ያዳያ፡፡ ሃይታንቲ ቄሴታ ሃላቃ ኢያሶ ዋዴን ባ ባጋ ቄሴታ ካሌሊዛ ቄሴታ፡፡
- 8 ሌዌታ፤ ጋላታ ዬፋ ዬዲሲዛይታስ አላፌ ጌዲዲ ሌዌቲ፤ ኢያሶ፤ ቢኑዌ፤ ቃዲሞኤሌ፤ ሼሬቢያ፤ ዩሁዳኔ ማታኒያ፡፡
- 9 ባቂቡቂያ፤ ኡኒኔ ሃራ ሌዌ ባጋፌ ጌዲዳ ኢስታ ኢሻቲ ኢስታራ ኢሲፌ ሶሬኒኔ ኤዶን ኢሶይ ኢሳፌ ኤኪ ዬጾቲስ፡፡
- 10 ኢያሶይ ኢዮአቂሜ ዬሊዴስ፤ ኢዮአቂሜይ ኤልያሼቤ ዬሊዴስ፤ ኤልያሼቤይ ዮያዳኤ ዬሊዴስ፡፡

11 የያዳኤይ የናታኔ ዩሊዴስ፤ የናታኔይ ያዳኤ ዩሊዴስ።

ቄሴታ ዜሬላ ሃላቃታ

12 እየኦቄሜይ ቄሴታ ሃላቃቱላን ዲዛ ዎዴ ቄሴቲኔ እስታ ሃላቃቲ ሃይሳፌ ካሊዛይታ፤ ሳራያ ዜሬላፌ ማራዬ፥ ኤርማሳ ዜሬላፌ ሃናኒያ፥

13 ኢዝራ ዜሬላፌ ማሹላሜ፥ አማሪያ ዜሬላፌ ዪሆሃናኔ፥

14 ማሉኬ ዜሬላፌ የናታኔ፥ ሹባኒያ ዜሬላፌ የሴፌ፥

15 ሃሪሜ ዜሬላፌ አዳና፥ ማራዮታ ዜሬላፌ ሂልቂያ፥

16 ኢዶ ዜሬላፌ ዛካራሳ፥ ጊንቶኔ ዜሬላፌ ማሹላሜ፥

17 አቢያ ዜሬላፌ ዚኪራ፥ ሚኒያሚኔፔኔ ሞኦዲያ ዜሬላፌ

ፒልጸዬ፥ *

18 ቢልጋ ዜሬላፌ ሻማኤ፥ ሻማኤ ዜሬላፌ የናታኔ፥

19 የያሪቤ ዜሬላፌ ማታኒያ፥ ያዳያ ዜሬላፌ ኡዜ፥

20 ሳላዬ ዜሬላፌ ቃላዬ፥ አሞኬ ዜሬላፌ ኤቦራ፥

21 ኪልቂያሳ ዜሬላፌ ሃሻቢያ፥ ያዳያ ዜሬላፌ ናቲናኤሌ፥

22 ቄሴታሶ አሳ ሱንሊኔ ሌዌ ባጋ አሳታሰ ሶ አሳ ሱንሊ ሃይሳፌ ካሊ ዲዛይሳ፤ ኤልያሼቤ፥ የያዳኤ፥ የሃናኔኔ ያዳኤ ጌቲቲዛ ቄሴታ ሃላቃቲ ዲዛ ዎዴ ሌዌ ባጋታ ሶ አሳታ ሃላቃቲኔ ቄሴታ ሶ አሳታ ሃላቃቲ ሻኬቲ ኤሬቲዛ ማዘጋቤይ ዴስ፤ ሄሲካ ፓሪሴ ዴሬ ካዎ ዳሪዮሲ ካዎቲ ዲዛ ዎዴና።

23 ጊዶ አቲን ሌዌ ባጋታ ሶ አሳታ ሃላቃታፔ ቆንጨን ማዘጋቤቲዲ ኤሬቲዲይቲ ኤልያሼቤስ ናዛ ና የሃናኔይ ሃይቃና ጋካናስ ዲዛ ዎዴን ጸላ።

ጸሳ ኬላን ኦላና አሳታ ኢስቲ ኦላና ኦሶን ሱንሊ

24 ሃሻቢያይ፥ ሼሬቢያይ፥ ኢያሶይ፥ ቢኑዌይኔ ቃዲሞኤሌይ ካሌሊዛ ሌዌ ባጋቲ ናሞኤ ኬዚ ሻኬቲዳ። ሄ ናሞኤ ባጋቲካ ጸሳ አሲ ካዎ ዳዊቲ አዛዚዳ አዛዘ ማላ ጸሳስ ጋላታ ዬላ ሶሬኒኔ ኤዶን ኢሶይ ኢሳፌ ኤኪ ዩጺሹ ሺሺዳ።

25 ጸሳ ኬላ ጊሞቤ ፔንጌ አቻን ኦሴቲዳ ሚሽ ዎሊዛ ሚንጃ ኬላ ናጊዛ ዛቤቲ ማታኒያ፥ ባቂቡቂያ፥ አብዲዬ፥ ማሹላሜ፥ ጸልሞኔኔ አቁቤ ጌቲቲዛይታ።

26 ሂይቲ እዮሳዶቄ ናዛ ና ኢያሶ ና እዮኦቄሜ ዴሬ አይሲዛ ናሂሚያ፥ ቄሴኔ ዎጋ ኬሂ ኤሪዛ ቄሴ ኢዝራንቲ ዲዛ ዎዴ ዶሬቲዳ ኦሳንቻቲ ዴቲስ።

* 12:17 ኢብራዊታ ማጽፋን ሚኒያሚኔ ጌቲቲዛ አዴዛ ሱንሊ ባዎ።

ዩሩሳሌም ካታማ ገምቤ እንጂሶ ባኣሌ

27 ዩሩሳሌም ካታማ ገምቤይ እንጃቲዛ ጋላስ ሌዌ ባጋቲ ዳላን፡ ባጋናኒኔ ማሲንቆን ዩጲዲ ቦንቻና ማላ ኢስቲ ዲዛሶፔ ዲዛሶፔ ኮዬቲዲ ዩዳ።

28 ሄ ባኣሌዛ ቦንቻና ሌዌ ባጋፌ ዩጲዛይቲ ዉሪ ባ ዲዛሶፔ ዩሩሳሌም ሄራፔኔ ናጾፌ ቢታን ዲዛ ሄራታፔ፡

29 ዩሩሳሌም ዩሹን ኢስቲ ባንታስ ዱሳሶ ኦሊዳ ጊሻስ ዩጲዛይታ ቤቲ-ጋልጋላፔ፡ ጌባፔኔ ኣዚሞቴፔ ሺሺዲ ኤሂዳ።

30 ቄሴቲኔ ሌዌ ባጋቲ ባ ጊሻስ፡ ዴራ ጊሻስ፡ ካታማ ገምቤዛ ጊሻሲኔ ገምቤዛ ፔንጌታ ጊሻስ ጌሾ ዎጋ ኦሊዳ።

31 ታኒ ናሂሚያይ ዩሁዳ ዴሬ ካሌሊዛይቲ ገምባ ቦላ ኬዛና ማላ ሂስቲዳፔ ጉዬ ሎኤሊ ዩፋ ዩጲዛይቲ ናሞኡ ቡቴን ሻኬቲዲ ዩጻና ማላ ኦፋዲስ፤ ኮይሮ ቡቴዚ ገምባስ ሁኡ ቦላ ኬዚዲ ኡሻቻ ባጋራ ዲዛ፡ «ቡራ ዩሳሶ» ኣፏ ቢዳ።

32 ኢስታካ ሆሻኢያይኔ ዩሁዳ ዴሬ ካሌሊዛይታፔ ባጋቲ ካሊዳ።

33 ሃራቲ ቃሴ ኢስታራ ዲዛ ኣዛሪያሲ፡ ኢዝራይ፡ ማሹላሚይ፡

34 ዩሁዳይ፡ ቢኒያሚይ፡ ሻማኤይ፡ ኤርማሲ ሳልፊዲ ኣፏዳ፤

35 ዛዬ ፑኒዛ ቄሴቲ፡ ቃሴካ ኣሳፌ ና፡ ዛኩሬ ና፡ ሚካያ ና፡ ማታኒያ ና፡ ሻማኤ ና፡ ዮናታኔ ና ዛካራሲ ኢስታራ ኣፏዳ።

36 ዛካራሳ ዜሬሊ ሻማኤይ፡ ኣዛሪኤሌይ፡ ሚላላይ፡ ገላላይ፡ ማኣዳይ፡ ናቲናኤሌይ፡ ዩሁዳይኔ ሃናኒያይ ጸሳ ኣስ ዳዊቲ ኢዛን ዩጲዛ ዩፋ ሚሽ ኤኪ ካሊዳ፤ ሄ ቡቴዛ ካሌሊዛይ ዎጋ ሎኤሊ ኤሪዛ ቄሴ ኢዝራ።

37 ፑልቶ ሃፋ ፔንጌኮ ጋኪዳፔ ጉዬ ዳዊቲ ካታማ ኤፊዛ ኦጌ ኦይኪዳ፤ ገምባ ቦላ ዲዛ ኬቻታ ፑዴ ኬዚዲ ካዎ ዳዊቲ ካዎቴፋ ኬፋ ኣቻራ ኣፏዲ ሄ ካታማይስ ኣርሼይ ኬዚዛ ባጋራ ዲዛ ሃፋ ገምቤ ፔንጌ ሲሚዳ።

38 ሃንኮ ዩፋ ዩጲዛ ቡቴዚ ገምባ ቦላራ ሃዲርሳ ባጋ ኣፏ ቢዴስ፤ ታኒካ ባጋ ኣሳራ ሃ ቡቴዛ ካላዲስ፤ ኢቶኔ ገምቤ ጌቲቲዛሶራ ካንሊዲ ጌዴ ኣሆ ገምቤዛኮ ጋኪዶስ።

39 ቃሴ ኦ ሃሳፌ ኣፏ ኤፍሬሚ ገምቤ ፔንጌ፡ ዩሻና ገምቤ ፔንጌ፡ ሞሌ ገምቤ ፔንጌ ጌቲቲዛሶኔ ሃናኒኤሌ ገምቤ፡ ጸቱ ገምቤታኔ ዶርሳታ ገምቤ ፔንጌ ጌቲቲዛሶታ ጋኪዶስ፤ ጸሳ ኬፋ ማታን ዲዛ ዛቤታ ገምቤ ፔንጌ ጌቲቲዛሶዛ ጋኪዲ ሳልፊዛ ጊኒዶስ።

40 ሃይሳዕ ናምኡ ቡቴ ሳልፌዚ ጸሳ ዩፋን ጋላቲሼ ታናራ ዲዛ ዴራ ካሌሊዛይታራ ጸሳ ኬሊ ዲዛሶ ዛዋ ጋኪደሰ፤

41 ታ ዲዛ ሳልፌዛን ጸሩምባ ፑኒዛ ቄሴቲ ሃይሳፌ ካሊ ዲዛይታ፤ ኤልያቄሜ፡ ማኢሳያ፡ ሚኒያሚኔ፡ ሚካያ፡ ኤልዮኤናዬ፡ ዛካራሳኔ ሃናኒያ፤

42 ኢስታካ ካሊዛይቲ ማኢሳያ፡ ሻማኤ፡ ኤልኤዜሬ፡ ኡዜ፡ ዪሆሃናኔ፡ ማልኪያ፡ ኤላሜኔ ኤዜሬ፤ ሄይቲ ባ ኤቁዛሶ ኤቁዛሶ ኦይኪዳ፤ ዩዲዛይቲ ዩዚራሄያይ ካሌሊን ባ ቃላ ቶቄ ሂስቲዲ ዩዲዳ፡፡

43 ሄ ጋላሰ አሳይ ዳር ያርሾ ሺሺዴሰ፤ ጸሳይ ኢዛ ኡፋይሲዳ ጊሻሰ ዴሬዚ ኬሂ ኡፋይቲዴሰ፤ ማጫሳይኔ ናይቲካ ኢስታራ ኢሲፌ ኡፋይቲዳ፤ ዩራሳላሚን ሃኒዳ ኢሊሊሳ ቃላይ ሃሆን ሲዩቲዴሰ፡፡

44 ሄ ዋዴ ጸሳ ኬፋ ኦሶሰ ኢሜቲዛ አሰራታኔ ላይፋን ላይፋን ኮይሮ ጋኪዛ ካፋ ጸራኔ ሜቲቲዛ ዲማ ዲማ ሚፋታ ኦይፌ ጸራ ዋሊዛ ኬል ናጊዛ ዛቤታ ዶሪዳ፤ ሄ አሳቲ ዲማ ዲማ ካታማታ ማታን ዲዛ ጎሻ ጋዴፔ ዋጋይ ኦዛዚዛ ማላ ቄሴታሲኔ ሌዌ ባጋታሰ ኢሜታና ቤሲዛይሳ ሺሻና ኦላፌቲል ኢስታሰ ዴሰ፤ ኩሚፋ ዩሁዳ አሳይ ቄሴታ ቦላኔ ሌዌ ባጋታ ቦላ ኬሂ ኡፋይቲዳ፡፡

45 ኢስቲ ኡፋይቲዳይካ ጸሳይ ኢስታ ኦዛዚዳ ቄሴቲኔ ሌዌቲ ፖላናሰ ቤሲዛ ዋጋኔ ጌሾ ዋጋታ ኦሊዳ ጊሻሳ፤ ጸሳ ኬፋን ዩዲዛይቲኔ ጸሳ ኬፋ ናጊዛ ዛቤቲካ ዳዊቲኔ ኢዛ ና ሶሎሞኔይ ካሴ ዋሊዳ ዋጋ ማላ ኢስታፌ ናጌቲዛ ኦሶ ኦሊ ፖሊዳ፡፡

46 ካሴ ካዋ ዳዊታፔኔ አሳፌ ዋዴፔ ዶሚዲ ዩፋ ዩዲዛይታሲኔ ጋላታ ዩፋን ጸሳ ቦንቺዛ አሳታ ካሌሊዛይቲ ዴቲሰ፡፡

47 ዜሩባቤሌ ዋዴኒኔ ናሂሚያ ዋዴን ኩሚፋ ኢሰራኤሌ አሳይ ጸሳ ኬፋን ዩዲዛይታሲኔ ናጊዛ ዛቤታሰ ጋላሰ ጋላሰ ኢሜታና ቤሲዛይሳ ኢሜቲሰ፤ ሃንኮ ሌዌ ባጋታይሳ ዲማ ኢሜቲሰ፤ ሌዌ ባጋቲካ አርኔ ዜሬፋፌ ጊዲዳ ቄሴታሰ ቤሲዛይሳ ኢሜቲሰ፡፡

13

ኦላጋታፔ ኢሰራኤሌ አሳ ሻኬቲል

1 ሄ ዋዴ አሳይ ዉሪ ሙሴ ማጽፋይ ናባቤቲን ሲዩሼ፡ «ሞአቤ አሳይኔ ኦሞኔ አሳይ ጸሳ አሳራ ሜርና ጋካናሰ ዋላኬቶፌቶ» ጊዛሶ ጋኪ ዴሚዴሰ፡፡

2 ሃ አዛዘዘክ እሜቲዳ ጋሶይካ ኢሰራኤል አሳይ ጊብዳ ቢታፊ ኬዚ ቢዛ ዋዴ ሞክሴ ዴሬ አሳይኔ ኣሞኔ ዴሬ አሳይ ካሊኔ ሃላ ኢሰራኤል አሳ ዲጊዳ ገሻሳ፤ ሃሳፊ ቦላራካ ኢሰራኤል አሳ ዶቃና ማላ ባላሜ ጌቲቲዛዴሰ ሚሽ እሚዳ፤ ጊዶ ኣቲን ጸሳይ ሄ ዶቁላዛ ኣንጆን ላሚዴሰ።

3 ሄ ዋጋ ቃላዛ ኢሰራኤል አሳይ ሲዬዳ ዋዴ ኣላጋ ጊዲዳ አሳ ባ ጊዶፊ ሻኪ ኬሲዳ።

ናሂሚያይ ኦራሊዳ ዋጋ

4 ጸሳ ኬላ ሚሻታ ዋሊዛ ኪፊሊታሰ አላፊ ጊዲዳ ቁሴ ኤልያሼቤሰ ዳር ላይላፊ ዶሚዲ ጸቢያራ ሚኖ ጋይቶቲሊ ዴሰ፤

5 ሃሳፊ ዴንዲዲይሳን ካላ ሙጽዋታ፡ ኤጻኔ፡ ጸሳ ኬላን ዲዛ ዲማ ዲማ ሚሻታ፤ ካላፊ፡ ዋይኔ ኡሻፊኔ ዋጋራ ዛይቲ፤ ኬሲዲ ሌዌ ባጋታሰ፡ ጸሳ ኬላን ዬጲዛይታሲኔ ናጊዛ ዛቤታሰ እሜቲዛ ኣሰራታይኔ ቁሴታሰ እሜቲዛ ሙጽዋታ ዋላናሰ ኦሴቲዳ ኣሆ ኪፊሊዛ ጸቢያይ ኢዛን ዳና ማላ ኤልያሼቤይ ኢዛሰ እሚዴሰ።

6 ሃይሲ ኡባይ ሃኒሺን ታ ዬሩሳላሜን ዲኬ፤ ጋሶይካ ካዋ ኣርጼኪሲሲ ባቢሎኔን ካዋቲዳ ሄዙ ታማኔ ናሞኣንሉ ላይላን ታኒ ጉዬ ሲማ ባቢሎኔ ዴሬ ባዲሰ፤ ጊዶ ኣቲን ጉላ ዋዴ፤ ጉዬ ካዋዛ ፒቃዴ ኦይቻዲሰ፤

7 ኦይቻዳካ ዬሩሳላሜ ሲማዲሰ፤ ታ ሄ ጋኪዳ ማላ ኤልያሼቤይ ጸቢያሰ ጸሳ ኬላ ጊቤ ጊዶን ኢዚ ዳና ማላ ኢዛሰ ኢሲ ኪፊሊ እሚዴይሳ ሲያዲሰ።

8 ሃሳ ገሻሰ ሃንቁታዳ ጸቢያሰ ዲዛ ሚሽ ኡባ ኢዚ ጌልሊዳ ኪፊላ፤ ካሬ ኬሳ ኬሳ ኦላዲሰ።

9 ኪፊሊቲካ ዋጋይ ጊዛይሳሉ ጌያና ማላኔ ጸሳ ኬላ ሚሻቲ፡ ካላ ሙጽዋታቲኔ ኤጻኔቲ ሲሚ ባ ካሴ ዲዛሶ ጌላና ማላ ኣዛዛዲሰ።

10 ቃሴ አሳይ ጸሳ ኬላን ዬጲዛይታሲኔ ሌዌ ባጋታሰ ኮሺዛይሳ እሞንታ ኣጊዳ ገሻሰ ዬሩሳላሜ፤ ጸሳ ኦሳ ኣጊዲ ካሴ ባ ዲዛ ጎሻ ጋዴ ጎዬ ዳናሰ ጉዬ ሲሚ ቢዲይሳ ኤራዲሰ።

11 ሃሳ ገሻሰ ታኒ ሃላቃታ፡ «ጸሳ ኬላ ኦሶ ኣይሰ ኣጊዴቲ?» ጋዳ ሃንቁታዲሰ፤ ሃሳፊ ጉዬ ሌዌ ባጋታኔ ዬጲዛይታ ዴይጋዳ ካሴ ኢሰቲ ጸሳ ኬላን ኦሊዛ ኦሶዛ ሲሚ ኦላና ማላ ዛራ ጌልላዲሰ።

12 ሄሳፌ ጉዬ ኢስራኤል አሳይ ወሪ ባ ካላፌ፡ ዋይኔ ኡሻፌኔ ዋጋሪ ዛይቴፔ ኢስታፌ ኮዬቴዛ ታማፌ ኢሲ ኩሼ ኬሲዲ ጸሳ ኬላ ሚሽ ዋሊዛ ሚንጃ ኬላ ኤሆ ደሚዴስ።

13 ታኒ ቄሴ ሹሌሚያ፡ ዋጋ ኤራንቻ ሳዶቂይኔ ሌዌ ባጋፌ ፓዲያ ሚሽ ዋሊዛ ሚንጃ ኬላስ አላፌ ሂስታ ዶራዲስ፤ ማታኒያ ናዛ ና ዛኩሬ ና ሃናኔይ ኢስታ ማዳና ማላ ዋላዲስ፤ ሃ አሳቲ ወሪ ባ ኢሻታስ ኮሺዛ ሚሼታ ሻኪ ሻኪ ኢማናስ አማኔቲዳይታ።

14 ታ ጎዶ! ኔ ኬላይኔ ኔ ኬላ ኦሶይ ሱሬ ባና ማላ ታ አማኔቲላን አሊዳ ሎኦ ኦሶዛ ቆፓዳ ኔ ታስ ኪያቴላ ኦላ።

15 ሄ ዋዴ ዩሁዳ ዴሬ አሳይ ሳምባታ ጋላስ ዋይኔ አይፌፔ ዋይኔ ጉምኢሺን ቤያዲስ፤ ቃሴ ካሐ፡ ዋይኔ ኡሹ፡ ዋይኔ አይፌ፡ ባላሴ አይፌኔ ሃራ ሚሻታካ ሃሬን ጫኒዲ ዬሩሳላሜ ኤሂሺን ቤያዳ ናምኦንላ ሳምባታ ጋላስ አይኮካ ዛልኦንታ ማላ ጋዳ ሚንላ ዮታዲስ።

16 ዬሩሳላሜን ዲዛ ጸርሴ ዴሬ አሳቲ ሞሌኔ ሃራ ሃራ ዛልኤ ሚሻታ ኤሂዲ ሳምባታ ጋላስ ዬሩሳላሜን ዲዛ ዩሁዳ ዴሬ አሳስ ባይዜቴስ፤

17 ሄሳ ጊሻስ ታኒ አይሁዳ ካሌሊዛይታ ሃንቂታዳ «ሃይሳ ኢንቴ ኦሊዛ ኢታ ኦሶዛ ኡባ ቤኢቴ! ሄኮ ኢንቴ ሳምባታ ቱኒሲሼ ዴታ፤

18 ኦ ጸሳይ ኦ ቦላኔ ሃ ካታማ ቦላ ኤሂዳ ሃንቆይ ካሴ ኢንቴ አዋቲ ሃይሳ ማላ ኢታ ኦሶ ኦሊዳ ጊሻስ ጊዴኔ? ሃኢካ ኢንቴ ሳምባታ ቦንቾንታ ጊሻስ ጸሳ ሃንቆ ኢስራኤል ዴራ ቦላ ዴንሌሌታ» ጋዲስ።

19 ሄሳፌ ጉዬ ሳምባታይ ጌላናፔ ሲንላ ጋላስ ጋዴይ ሌምኢ ሌምኢሺን ዬሩሳላሜ ፔንጌቲ ጎርዴቲዲ ሳምባታይ አፋና ጋካናስ ዶዬቶንታ ማላ ታኒ አዛዛዲስ፤ ቃሴ ሳምባታ ጋላስ አይኮ ሚሼ ዛልኦና ኤኪ ዮንታ ማላ ታ ኦሳንቻታፔ ኢሶታ ኢሶታ ጊምባ ፔንጌ ናጋና ማላ ዛቤ ዋላዲስ።

20 ዲማ ዲማ ሚሻታ ኤሂ ዛልኢዛ ዛልኦንቻቲ ኢሲቶ ዋይኮ ናምኡቶ ማላ አርባ ኦማርስ ዬሩሳላሜ ጊምቤስ ካሬ ባጋራ አቂዳ፤

21 ታኒካ ኢስታስ፡ «ኢንቴ ማላዶ ዋንታራ ጌላናስ ቆፒዲ ጊምባፌ ካሬ ባጋራ አቂዛይሲ ኢንቴና ማዴና፤ ቃሴ ኢንቴ ሄሳ ማላ ኦሶ ናምኦንላ ኦሊዛ ጊዲኮ ታ ኢንቴ ቦላ ታ ዋልቃ ቤሳና» ጋዳ ሚንላ ዮታዲስ፤ ሄሳፌ ዶሚዲ ሳምባታ ጋላስ ዩስ አጊዳ።

22 ሄሳፌ ጉዬ ሌዌቲ ባንታና ጌሺዲ ሳምባታ ጋላስ ዱማቴላን ናጌቲዛይሳ ኤሪሳናስ ጊምባ ፔንጌታ ናጋና ማላ ኢስታ አዛዛዲስ።

ታ ጸሳዉ! ሃይሳ ኡባ ጊሻሰ ታና ቆፓ፤ ቃሴ ኔኒ ኔ ሚኖ ሲቆዛን ታና ማዳና ማላ ታ ኔና ዋሳይሰ።

23 ሄ ዋዴ አይሁዳ አሳፔ ዳሮቲ አሽዶዴ፥ አሞኔኔ ሞኣቤ ዳሬፔ ማጫሳታ ማቾ ባሰ ኤኪዳይሳ ኤራዲሰ።

24 ኢስታ ናይታፔ ባጋቲ አሽዶዴ ዳሬ ቃላኔ ኢሲ ኢሲ ሃራ ዳሬ ቃላን ሃሳዬቲሰ አቲን አይሁዳ ዳሬ ቃላን ሃሳያና ዳንዳይቤቲና።

25 ታኒ ሄ አሳታ ሃንቃዳ ቃንጋዲሰ፤ ዋዳዲሲኔ ኢስታ ሁኤ ቢናናካ ቡጫዲሰ፤ ሄሳፌ ጉዬ ኢስታ ጊዲን ኢስታ ናይቲ አላጋ አሳታራ ኤኬቶንታ ማላኔ ጌሌቶንታ ማላ ጸሳ ሱንላን ጫቄላዲሰ።

26 ቃሴ ኢስታሰ፡ «ኢሰራኤሌ ካዎ ሶሎሞኔይ ናጋራ ኦሊዳይ ሃይሳ ማላ አላጋ አሳታፔ ማቾ ኤኮን ጊዴኔ? ዳሮ ካዎቲላ ጊዶን ኢዛ ማላ ካዎይ ቤቲቤና፤ ጸሳይ ኢዛ ዶሲዳ ጊሻሰ ኢሰራኤሌ ዳሬ ቦላ ካዎሊዳሰ፤ ጊዶ አቲን አላጋ ዳሬ ማጫሳቲ ኢዚ ናጋራ ኦላና ማላ ካሊሊዳ።

27 ሂሰቲን ኢንቲ አላጋ ካዎቲላ ማጫሳታ ኤኮን ሃይሳ ማላ ጊታ ሞሮ ኦሶይሳኔ ኢንቲ ኦ ጎዳሰካ አማኔቶንታ አጎይሳ ኦ ሲያና ቤሲዜ?» ጋዲሰ።

28 ቄሴ ኤልያሼቤ ናይታፔ ኢሶይ ዮዳሂ ጌቲቲዛይሲ ቤቲ-ሆሮኔ ካታማ ኣሲ ሳንባላጾ ናዮ ባሰ ማቾ ኤኪዳሰ፤ ሄሳ ጊሻሰ ዮዳሂይ ዬሩሳሌሜ ዬዲ ባና ማላ ጎዳዲሰ።

29 «ታ ጸሳዉ! ሃይቲ ቄሴቲላ ዋጋ፥ ቄሴታራኔ ሌዌ ባጋታራ ኔ ካሴ ዋሊዳ ጫቆ ቃላ ኢሰቲ ዋሰቲ ቱኒሲዳኮ ሃይሳ ጸሶ ኔ ዴላ!» ጋ ዋሳይሰ።

30 ኢሰቲ አላጋ ዳሬ ቱናቲላፌ ባና ጌሻና ማላ ታ ኦላዲሰ፥ ቄሴቲኔ ሌዌ ባጋቲ ባ ኦሶ ኦሶ ኤሪ ኦላና ማላ ዋጋ ጊጊሳዲሰ።

31 ቃሴ ያርሾ ጸጋናሰ ኤሶ ሚሶ ኮሺዛ ዋዴን ኤሃና ማላ ጊጊሳዲሰ፤ አሳይካ ባ ሺሺዛ ካላፌኔ አይፊዛ ሚሳ አይፌፔ ኮይሮ ጋኪዳ ጸራ ዋሰቲ ሺሻናሰ ቤሲዛኮ ማራ ኦይላዲሰ፤ ታ ጸሳዉ! ኔ ሎኤቲላን ሃይሳ ታ ኦሊዳ ሎኦ ኦሶዛ ጊሻሰ ታና ቆፓ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b